

# Hinisis



# **Contents**



# Hinisis

## Ka Bunsuranan

Igpewun-a

**K** a kaluwasan te lalag ne *Hinisis*, “bunsuranan”. Seini ne baseen, kayi nasulat ka peggimu te langit wey te tane, ka migpuunan te etew, wey ka bunsuranan te sale wey peg-antus kayi te kalibutan. Nasulat man-e kayi ka guhuren meyitenged te keet-etawan ne in-alam te Manama wey ka peg-uyan din kandan diye te inged ne insaad din kandan.

**N** abaad te daruwa seini se baseen:

**1** .) Ka peggimu te kalibutan wey ka guhuren meyitenged te me etew. Kayi egkabasa ka guhuren meyitenged ki Adan wey ki Iba, ka meyitenged ki Kain wey ki Abil, wey ka meyitenged ki Nuwi wey ka peggipuk te weyig, wey ka meyitenged te matikang ne baley diye te Babil.

**2** .) Ka guhuren meyitenged te an-anayan ne me kabuybuyahan te Israilita. Si Abraham ka an-anayan ne kabuybuyahan te Israilita ne neyimu ne mabantug tenged te pegpalintutuu wey pegaslig din wey te pegtuman din te suhu te Manama. Egpaakinundul degma ka guhuren meyitenged te anak din ne si Isaak, wey ka apu din ne si Hakub (ne egngaranan ded degma ki Israil), wey ka sapulu wey daruwa (12) ne anak ni Hakub ne iyan migpuunan te sapulu wey daruwa (12) ne me kabuhalan te Israil. Nahuhud degma kayi ka meyitenged te anak ni Hakub ne si Husi wey ka neyitabu kandin ne iyan impuunan te nekeendiye te Ihiptu si Hakub duma te me anak din.

**E** gkabasa ta man-e kayi ka guhuren meyitenged te nalein-lein ne me etew ne nabuhal-buhal kayi te ampew te tane wey migmannenasud e. Labew te langun, nahuhud kayi ka dakel ne himu te Manama ne peggimu te langit wey tane wey te langun ne nakatahu kayi.

**D** iye te katamanan te guhuren, egkahuhud ka ware egtamanan ne saad te Manama te keet-etawan din. Kene eglingawan te Manama ka saad din wey kene din iya egbalaharen ka keet-etawan din su egpanuluen wey ebulihan din sikandan. Ne sikandin ka eggukum wey egleppad te langun ne eggimu te mareet. Ka nenasulat te seini ne baseen Ka peggimu te Manama te langit wey te kalibutan 1:1–2:25 Ka bunsuranan te sale wey te peg-antus 3:1-24 Ka guhuren ki Adan peendiye te ki Nuwi 4:1–5:32 Si Nuwi wey ka peggipuk te weyig 6:1–10:32 Ka matikang ne baley diye te Babil 11:1-9 Ka guhuren ki Sim peendiye te ki Abraham 11:10-32 Ka me kabuybuyahan te me Hibruwanen: si Abraham, si Isaak, wey si Hakub 12:1–35:29 Ka me kabuhalan ni Isaw 36:1-43 Si Husi wey ka me suled din 37:1–45:28 Ka me Hibruwanen diye te Ihiptu 46:1–50:26

Ka peggimu te kalibutan

1Te an-anayan, inggimu te Manama ka langit<sup>1</sup> wey ka kalibutan. <sup>2</sup>

---

<sup>1</sup> + <sup>1:1</sup> Ka me Hudiyu migsuman-suman ne masulug ne untud ka langit, purisu “me langit” ka diye te sinulat dan.

Ne ware pad naay-ayari ka kalibutan dengan, wey ware pad tahu. Nabun-bunan te dahat ka tane wey marusilem amana. Ne migweil-weil ka Panisungan te Manama diye te ampew te weyig. <sup>3</sup> <sup>2</sup> Ne migkahi ka Manama, “Egkeyimu ka malayag.” Te sikan de, neyimu e ka malayag. <sup>4</sup> Ne natelesan ka Manama te malayag ne nakita rin. Ne impegsuwey rin ka malayag wey ka delem. <sup>5</sup> Migngaranan din ka malayag te “Maaldew” wey migngaranan din ka delem te “Marusilem.” Ne nasagkup e wey napawe, ne seeye ka an-anayan ne aldew.

<sup>6</sup> <sup>3</sup> Ne migkahi ka Manama, “Egkeyimu ka eletanan te weyig eyew egkabaad te daruwa ka weyig, diye te ampew ka sabeka ne baad wey diye te diralem ka sabeka.” <sup>7</sup> Te sikan de, neyimu e ka eletanan, wey nabaad e te daruwa ka weyig, diye te ampew ka sabeka ne baad wey diye te diralem ka sabeka. <sup>8</sup> Migngaranan din ka eletanan te “Aw-awangan”. Ne nasagkup e wey napawe, ne seeye ka igkarangeb ne aldew.

<sup>9</sup>Ne migkahi ka Manama, “Egkalibulung de te sabeka ne inged ka weyig ne diye te diralem te aw-awangan su eyew egpakalepew ka tane ne mammara.” Te sikan de, neyimu e. <sup>10</sup> Migngaranan din ka mammara te “Tane” wey migngaranan din te “Dahat” ka weyig ne nalibulung. Ne natelesan ka Manama te nakita rin. <sup>11</sup> Nataman, migkahi e man-e ka Manama, “Egtubu diye te tane ka nakalkalasi ne pinamula, seeye se due me beni wey seeye se me kayu ne egbebehas.” Te sikan de, neyimu e.

<sup>12</sup> Ne nanubu te tane ka langun ne nakalkalasi ne pinamula. Ne natelesan ka Manama te nakita rin. <sup>13</sup> Ne nasagkup e wey napawe, ne seeye ka igkatelu ne aldew.

<sup>14</sup>Ne migkahi ka Manama, “Egkeyimu ka me malayag diye te langit ne iyan egpegsuwey te maaldew wey marusilem wey eyew egpeila te pegbunsud te me aldew, te me timpu, wey te me leg-un. <sup>15</sup> Eglayag sikan-dan diye te langit eyew egteng-ew te kalibutan.” Te sikan de, neyimu e.

<sup>16</sup> Sikan naa, inggimu te Manama ka daruwa ne mallayag; ka aldew wey ka bulan. Ka aldew ne lelayahi, iyan eglayag te maaldew; ne ka bulan, iyan eglayag te marusilem. Ne inggimu rin degma ka me bituen. <sup>17</sup> Intahu te Manama ka me malayag diye te langit eyew egteng-ew te kalibutan, <sup>18</sup> wey eyew eglayag te maalbew wey te marusilem, wey eyew egpegsuwey te malayag wey te delem. Ne natelesan ka Manama te nakita rin. <sup>19</sup> Ne nasagkup e wey napawe, ne seeye ka igkeep-at ne aldew.

<sup>20</sup>Ne migkahi ka Manama, “Egpekeempet kayi te weyig ka nakalkalasi ne ngalap wey egpekeempet degma diye te aw-awangan ka nakalkalasi ne manuk-manuk.” <sup>21</sup> Sikan naa, inggimu te Manama ka me bubuyahen ne me ngalap diye te dahat wey ka nakalkalasi ne ngalap diye te weyig wey ke diye te dahat, wey ka nakalkalasi degma ne manuk-manuk. Ne natelesan ka Manama te nakita rin. <sup>22</sup> Ne impanalanginan sikandan te Manama te migkahi, “Kabuhal kew. Sikaniyu se me isda,

<sup>2</sup> + <sup>1:3:</sup> 2Kur 4:6.

<sup>3</sup> + <sup>1:6-8:</sup> 2Pid 3:5.

empeta niyu ka dahat, ne sikaniyu se me manuk-manuk, empeta niyu ka kalibutan.”<sup>23</sup> Ne nasagkup e wey napawe, ne seeye ka igkalimma ne aldew.

24Ne migkahi ka Manama, “Egkeyimu kayi te ampew te tane ka nakalkalasi ne mananap, ka me ayam wey ka me mahintalunan, ka derakel wey mallintek ne me mananap.” Te sikan de, neyimu e.<sup>25</sup> Sikan naa, inggimu rin ka langun ne nakalkalasi ne me ayam wey me mahintalunan. Ne natelesan ka Manama te nakita rin.

26<sup>4</sup> Ne migkahi man-e ka Manama, “Eggimu ki te etew ne iling kanta. Sikandan ka egbuut te me ngalap te weyig, me manuk-manuk, me ayam, wey te langun ne mahintalunan, ka derakel wey ka mallintek ne me mananap.”<sup>27</sup><sup>5</sup><sup>6</sup> Sikan naa, inggimu te Manama ka etew iling kandin. Inggimu rin ka lukes wey ka malitan.<sup>28</sup> Ne impanalanganan sikandan te Manama ne migkahi, “Kabuhal kew eyew egpekeempet ka kabuhalan niyu kayi te ampew te tane wey sikandan ka egbuut te langun. Sikaniyu ka egbuut te me isda, me manuk-manuk wey te langun ne mananap.<sup>29</sup> Igbehey ku kaniyu ka langun ne pinamula ne egbebehas wey ka me behas te kayu, eyew egkeen-en niyu.<sup>30</sup> Igbehey ku degma te langun ne me mananap, me manuk-manuk, wey te langun ne egmangge-heyinawa ka me pinamula ne meilem

eyew egkeen-en dan.” Te sikan de, neyimu e.<sup>31</sup> Ne nakita te Manama ka langun ne inggimu rin wey natesan amana sikandin. Ne nasagkup e wey napawe, ne seeye ka igkeen-em ne aldew.

2Sikan naa, napenge e te eggimu ka langit wey ka kalibutan wey ka langun ne nakatahu kayi.<sup>2</sup><sup>7</sup><sup>8</sup> Te igkapitu ne aldew, miggimeley e ka Manama su napenge e ka langun ne inggimu rin.<sup>3</sup> Impanalanganan din ka igkapitu ne aldew wey immatulus din seini, su miggimeley e sikandin te sika ne aldew te langun ne eggimuwen din.

4Iling kayi ka guhuren meyiteng te peggimu te kalibutan wey te langit.

Ka inged ne egngaranan te Idin

T e peggimu te Magbebaye ne Manama te langun,<sup>5</sup> ware pad me pinamula wey me hilamunen ne nanubu te tane, su ware din pad peurani, wey ware pad etew ne egbasuk.<sup>6</sup> Minsan ware pad uran, piru migmakames e ka tane su duen e weyig ne migligkat diye te diralem te tane.

7<sup>9</sup> Ne migkuwa ka Magbebaye ne Manama te tane wey inggimu rin ne etew. Inggiyupan din ka irung te etew te egpekeuyag ne geyinawa, wey miggeheyinawe e ka etew.

<sup>4</sup> + **1:26:** 1Kur 11:7.

<sup>5</sup> + **1:27-28:** Hin 5:1-2.

<sup>6</sup> + **1:27:** Mat 19:4; Mar 10:6.

<sup>7</sup> + **2:2-3:** Iks 20:11.

<sup>8</sup> + **2:2:** Hib 4:4,10.

<sup>9</sup> + **2:7:** 1Kur 15:45.

8Ne miggimu ka Magbebaye ne Manama te pinamulaan diye te Idin ne diye dapit te igsile, wey diye din ipeugpe ka etew.<sup>9</sup> <sup>10</sup> Ne im-patubuan seeye te Magbebaye ne Manama te langun ne nakalkalasi ne kayu ne mateles wey meupiya ne egkeenen se behas. Diye te taliware te pinamulaan, due kayu ne egpakabehey te umul, wey due degma kayu ne egpakabehey te katuenan ke nekey ka meupiya wey ke nekey ka mareet.

10Ne due weyig ne diye migulun te Idin ne nakaweyig te seeye ne pinamulaan. Ligkat dutu, migsisiyak seeye te hep-at ne siyak.<sup>11</sup> Ka an-anayan ne siyak, egngaranan te Pisun ne migpeendiye te inged ne egngaranan te Habilan ne due bulawan.<sup>12</sup> (Dutu ne inged egkakita ka neelin ne bulawan, mahal ne peemut ne egngaranan te birilyum, wey ka egpangilak-ilak ne me batu ne egngaranan te uniks.)<sup>13</sup> Ka igkarangeb ne siyak, egngaranan te Gihun ne migpeendiye te inged ne egngaranan te Kus.<sup>14</sup> Ka igkatedu ne siyak, egngaranan te Tigris ne migleus diye dapit te igsile te Asirya. Ka igkeep-at ne siyak, egngaranan te Iyupratis.

15Ne diye ipeugpe te Magbebaye ne Manama te pinamulaan te Idin ka lukes eyew egbasuk wey egtanggu dutu.<sup>16</sup> Migkahiyen din ka lukes, “Egkaayun ka ne egpakakeen te behas te minsan nekey ne kayu kayi te pinamulaan,<sup>17</sup> piru kene ka keen te behas te kayu ne egpakabehey te katuenan ke nekey ka meupiya wey ke nekey ka mareet. Ke egkeen ka te

behas te sika ne kayu, egkapatey ka iya.”

18Ne migkahi ka Magbebaye ne Manama, “Kene ne meupiya ne egsab-sabeka seini se etew. Keilangan ne eggimuan ku sikandin te talagbulig ne eleg kandin.”

19Sikan naa ka miggimu ligkat te tane ka Magbebaye ne Manama te langun ne me mananap wey me manuk-manuk wey impanguyan din seeye diye te etew eyew epganggaranan sikandan. Minsan nekey ka igngaran te etew te tagse sabeka kandan, sikan en iya ka ngaran dan.<sup>20</sup> Ne impanggaranan e te etew ka langun ne mananap, me ayam, me mahintalunan, wey me manuk-manuk. Piru ware iya nakita te etew ne eleg ne egpakabulig kandin.

21Purisu impaliplipereng te Magbebaye ne Manama ka etew. Te nakaliplipereng e sikandin, in-anney e te Manama ka gusuk din wey impakimut din ded ka pali.<sup>22</sup> Ne ingimurin ne malitan ka gusuk ne in-anney rin diye te lukes, wey in-uyan din e ka malitan diye te lukes.<sup>23</sup> Te pegkakita te lukes te malitan, migkahi e sikandin,

“ Te! Senid en iya ka iling keddi!

K a tul-an din, migligkat te tul-an ku, wey ka sapu din, migligkat degma te sapu ku.

‘ Malitan’ ka ngaran din<sup>11</sup> su in-anney man de ligkat te lukes.”

<sup>10</sup> + 2:9: Imp 2:7; 22:2,14.

<sup>11</sup> + 2:23 Te Hibruwanen: bayew egpekegsahid ka ngaran te “malitan” wey “lukes.”

<sup>24</sup> <sup>12</sup> Sika ka egpuunan ne engked ka lukes te amey wey iney rin, wey eglunggun e sikandin te asawa rin, wey egkasabeke e sikandan se daruwa.

25Ne sikandan se alunggun, migpalawas, piru ware sikandan neylew.

Ka pegsupak te etew te Manama

<sup>3</sup> <sup>13</sup> Na, due uled ne iyan ka amana ne utekan te langun ne mananap ne inggimu te Magbebkiye ne Manama. Mig-insaan te uled ka malitan, “Ingkenaan kew bes te Manama ne egkeen te langun ne behas te me kayu kayi te pinamulaan?”

2Ne migtabak ka malitan, “Egkaayun key ne egkeen te behas te minsan nekey ne kayu kayi te pinamulaan <sup>3</sup> gawas te behas te kayu ne kayi te taliware. Impanganayan key te Manama ne kene egpakeenen wey minsan egksam naan de te behas te sika ne kayu eyew kene key egkatey.”

4Piru migkahi ka uled, “Kene ne malehet ne egkatey kew. <sup>5</sup> Nakahi sika te Manama su nakataha sikandin ne emun ke egkeen kew due, egkapuwasan ka isip niyu wey egpekeiling kew kandin ne egpakataha ke nekey ka meupiya wey ke nekey ka mareet.”

6Te pegkakita te malitan ne mateles ka kayu wey mananam buwa ne egkeenen ka behas, neeyaman sikandin ne egpupu eyew egpakakuwa

te katuenan. Purisu, migpupu e sikandin wey ingkeen din e. Ne imbehayen din ka asawa rin wey migkeen e degma sikandin. <sup>7</sup> Te nakapenge e sikandan ka migkeen, napuwasan e ka isip dan wey nakamaan-maan e sikandan ne migpalawas bes sikandan. Tenged due, migkuwa sikandan te me dewun te kayu ne iggira wey impaneyi dan e seini eyew igbebaag dan.

8Te egkasagkup e, nakarineg sikandan te pegderahedeb te Magbebkiye ne Manama diye te pinamulaan, ne dutu miggeles e sikandan diye te kakayuhan. <sup>9</sup> Piru in-umew te Magbebkiye ne Manama ka lukes, “Hendei kad e?”

10Ne migtabak ka lukes, “Nakarineg a te pegderahedeb nu kayi te pinamulaan wey miggeles ad e su naaldek a tenged su migpalawas a.”

11Ne mig-inse ka Manama, “Hentew-a ka mignangen keykew ne migpalawas ka? Migkeen ka te behas te kayu ne ingkene ku keykew?”

12Ne migtabak ka lukes, “Ka malitan ne imbehey nu keddi ka migbehey keddiey te behas te kayu. Sikan naa ka nakakeen a.”

13 <sup>14</sup> Ne mig-insaan te Magbebkiye ne Manama ka malitan, “Mania te inggimu nu seini?”

<sup>12</sup> + <sup>2:24:</sup> Mat 19:5; Mar 10:7-8; 1Kur 6:16; Ipi 5:31.

<sup>13</sup> + <sup>3:1:</sup> Imp 12:9; 20:2.

<sup>14</sup> + <sup>3:13:</sup> 2Kur 11:3; 1Tim 2:14.

N e migtabak ka malitan, “In-akalan a te uled. Sikan naa ka nakakeen a te behas te kayu.”

Ka peglegpad te Manama tenged te sale

14Ne migkahiyan te Magbebaye ne Manama ka uled,

“ Tenged su inggimu nu sika, egleg-paran ku sikeykew. Te langun ne mananap, sikeykew re ka egdilusen. Ligkat kuntee, egdul-ug kad e wey egkeen kad te alinepung taman te eg-patey ka.

15<sup>15</sup> Egpegkuntreen ku sikaniyu te malitan wey ka me kabuhalan niyu degma. Egdekdeken te kabuhalan din ka ulu nu wey egkahaten nu degma ka palu rin.”

16Ne migkahiyan te Manama ka malitan,

“ Tenged te inggimu nu sika, egtimulan ku ka peg-antus nu te peg-anak nu wey masakit ka egkaheram nu ke eglesutan ka. Piru minsan pad due, dakel red ka isip nu te asawa nu wey<sup>16</sup> sikandin ka egbuut keykew.”

17<sup>17</sup> Ne migkahiyan te Manama ka lukes ne si Adan,

“ Tenged te mig-alak ka te asawa nu wey migkeen ka te behas te kayu ne ingkene ku keykew, egdilusen ku ka tane.

L igkat kuntee, wey re egpanubu ka pinamula nu ke egkabaybayaran ke pad ne egbasuk.

18Egpanubu te tane ka me hilamunen wey ka me duhi, wey egkeen ka te me pinamula ne egpanubu diye te kamet.<sup>19</sup> Ne wey ka egpakaahaani te pinamula nu ke egkabaybayaran ke pad ne egbasuk, wey egthihs pad ka limuseng nu. Egkataman, egpakalibed ka diye te tane ne migligratan nu. Su inggimu ka ligkat te tane ne egpakaalibed ke red diye te tane.”

20Nataman, migngaranan ni Adan ka asawa rin ki Iba<sup>18</sup> su sikandin ma ka iney te langun ne etew.<sup>21</sup> Ne inggimuwian te Magbebaye ne Manama ensi Adan wey si Iba te manggad ne migligrat te mananap wey impakumbalaan din e sikandan.

Ka pegdeldel ki Adan wey ki Iba ligkat te pinamulaan

22<sup>19</sup> Ne migkahi ka Magbebaye ne Manama, “Kuntee, nekeiling e ka etew kanta ne nakataha ke nekey ka meupiya wey ke nekey ka mareet. Keilangan ne kene egpaketupu wey egpakahehey te umul, su keilangan ne kene egkeuyag sikandan te ware egtamanan.”<sup>23</sup> Sikan naa ka indeldel e sikandan te Magbebaye ne Manama ligkat te pinamulaan te Idin wey egpabasuen e si Adan te tane ne migligratan din.

<sup>15</sup> + 3:15: Imp 12:17.

<sup>16</sup> + 3:16 Kene ne klaru seini wey kema ke, “Egkeupian ka ne iyan egmandu te asawa nu, piru” ka malehet ne peggalin kayi.

<sup>17</sup> + 3:17-18: Hib 6:8.

<sup>18</sup> + 3:20 Te Hibruwanen: “egkeuyag” ka kaluwasan te lalag ne “Iba.”

<sup>19</sup> + 3:22: Imp 22:14.

24Ne impaaawe e te Manama ka alunggun, wey intahuan din e te me talagtameng ne panalihan ne egngaranan te kirubin<sup>20</sup> ka diye dapit te igsile te pinamulaan te Idin. Ne imparuma rin ka kampilan ne egkalegleg wey egkatileng eyew ware etew ne egpakarani-rani te kayu ne egpakabehey te umul.

Si Kain wey si Abil

4Ne migpewulirey e ka alungun ne si Adan wey si Iba. Nataman, naberes e si Iba wey miglesutan e te lukes. Migkahi si Iba, “Nakaanak a te lukes ligkat te pegbulig te Magbebaye ne Manama.” Purisu ingngaranan din ka bate ki Kain.<sup>21</sup><sup>2</sup> Nataman, nakaanak e man-e sikandin te lukes ne ingngaranan din ki Abil. Hengkayi te migtulin e ka tahasuled, neyimu si Abil ne talagtameng te me karniru wey si Kain neyimu ne talagbasukan.<sup>3</sup> Sabeka ne aldew, migangey si Kain te me behas te pinamula rin ne inhalad din diye te Magbebaye ne Manama.<sup>4</sup><sup>22</sup> Piru mig-angey mule si Abil te me panganey ne anak te me ayam din, ne impanlape din seeye wey in-alam din ka subla ne meupiya ne baad dutu wey impanubad din te Magbebaye ne Manama. Ne nahale amana ka Magbebaye ne Manama ki Abil wey te impanubad din,<sup>5</sup> piru ware sikandin nahale ki Kain wey te inhalad din. Purisu, subla ne nabelu si Kain wey migpaasemud sikandin.<sup>6</sup> Ne migkahiyan te Magbebaye ne Manama si Kain, “Mania te egkabelu ka wey migpaasemud ka?”<sup>7</sup> Ke me-

upiya ka eggimuwen nu, egdawaten ku perem ka halad nu. Piru ke mareet ka eggimuwen nu, ka sale ka egmandu keykew. Su ka sale egpekeiling te uled ne eg-atang keykew eyew egkahaten ka. Purisu keilangan ne egkatalu nu ka sale.”

8<sup>23</sup> Nataman, migkahiyan ni Kain ka hari rin ne si Abil, “Kuwa kid e Abil. Eggendiye ki te kamet.” Te diyad e sikandan te kamet, in-uney e himatayi ni Kain ka hari rin.

9Ne mig-insaan te Magbebaye ne Manama si Kain, “Hendeid e ka hari nu ne si Abil?”

N e migtabak si Kain, “Hanew te la! Maa sikeddi ka talaggaat te hari ku su!”

10<sup>24</sup> Ne migkahi ka Magbebaye ne Manama ki Kain, “Mania te neyimu nu sika se mareet ne himu? Te pegkakita ku te langesa te hari nu diye te tane, iling te egpakarineg a te laheng din ne egbuyu te pegruli.<sup>11</sup> Tenged te inggimu nu, igdilus ka. Puun kuntee, kene kad e egpakabasuk te tane ne inleneban te langesa te hari nu.<sup>12</sup> Ke egpamula ka, ka tane kenad egbehey te egkahaani. Ne eggeleheles ka wey egkalaag-laag kad e kayi te ampew te tane.”

13Ne migkahiyan ni Kain ka Magbebaye ne Manama, “Mabehat amana ka iglepad nu keddi.<sup>14</sup>

<sup>20+</sup> **3:24** Ka kirubin, sabeka ne klasi te panalihan ne egpekeiling te mananap ne due pakpak wey belad.

<sup>21+</sup> **4:1** Te Hibruwanen: “egpakakuwa” ka kaluwasan te lalag ne “Kain.”

<sup>22+</sup> **4:4:** Hib 11:4.

<sup>23+</sup> **4:8:** Mat 23:35; Luk 11:51; 1Huw 3:12.

<sup>24+</sup> **4:10:** Hib 12:24.

Indeldel a nikeykew ligkat te seini ne tane wey diye te tangkaan nu. Eggeles-heles ad wey egkalaag-laag ad kayi te ampew te tane, wey eggimatayan ad te minsan hentew ne eg-pakakita keddiey.”

15Piru migtabak ka Magbebaye ne Manama kandin, “Kene, su sika se egpekeyimatey keykew, eglegparan ku degma te pitu ne lupi.” Sikan naa, intahuan te Magbebaye ne Manama te tuus si Kain eyew kene egkeyimatayan te egpakakita kandin. <sup>16</sup> Sikan de iya ne mig-awe e si Kain diye te tangkaan te Magbebaye ne Manama wey diyad e mig-ugpe te inged ne egngaranan te Nud, <sup>25</sup> ne diye dapit te igsile ligkat te Idin.

Ka me kabuhalan ni Kain

17Ne migpewulirey e si Kain te asawa rin. Nataman, naberes e ka asawa rin wey mig-anak te lukes ne migngaranan dan ki Inuk. Ne migpasasindeg si Kain te siyudad ne migngaranan din ki Inuk, su im-pasangey rin te anak dan ne panganey. <sup>18</sup> Si Inuk, nakaanak ki Irad. Ne si Irad, nakaanak ki Mihuail. Ne si Mihuail, nakaanak ki Mitusail. Ne si Mitusail, nakaanak ki Lamik. <sup>19</sup> Ne si Lamik, migduruwey. Si Ada wey si Sila ka ngaran te me asawa rin. <sup>20</sup> Si Ada nakaanak e ki Habal. Ne si Habal ka migligkatan te talaayamen ne mig-ugpe diye te me balungbalung. <sup>21</sup> Due inggiba ni Habal ne egngaranan ki Hubal. Si Hubal ka migligkatan te langun ne egkateu ne egpanguglung wey egpa-

mulendag. <sup>22</sup> Ne miglesutan e degma si Sila ki Tubalkain. Si Tubalkain ka an-anayan ne talagpanayab te burunsi wey me putew. Due atebey ni Tubalkain ne egngaranan ki Naama. <sup>23</sup> Ne migkahiyan ni Lamik ka daruwa ne asawa rin,

“ Ada, Sila, pammineg kew keddi.

N akapatey a te kanakan ne nakapali keddi.

24Ke pitu ne lupi ka igsuli te etew ne egpakapatey ki Kain,

p itu ne pulu wey pitu (77) mule ne lupi ka igsuli te etew ne egpakapatey keddi.”

Ka me kabuhalan ni Sit

25Ne migpewulirey e man-e si Adan wey si Iba wey nakaanak e man-e te lukes. Migkahi si Iba, “Imbehayan ad e man-e te Manama te anak ne lukes ne inliwan din ki Abil ne inggimatayan ni Kain.” Sikan naa, ingngaranan din ka bate ki Sit. <sup>26</sup> <sup>26</sup> Si Sit nakaanak te lukes ne migngaranan din ki Inus. Te seeye ne timpu, migbunsud ka me etew ne migampu wey migsaye te Manama, wey Magbebaye ne Manama ka ngaran din ne ig-umew ran.

Ka me kabuhalan ni Adan  
(1 Kru. 1:1-4)

5 <sup>27</sup> Seini ka pangguhuren meiyitenged te me kabuhalan ni Adan. (Te peggimu te Manama te me etew,

<sup>25</sup> + 4:16 Te Hibruwanen: “egkalaag-laag” ka kaluwasan te lalag ne “Nud.”

<sup>26</sup> + 4:25 Te Hibruwanen: “imbehayan” ka kaluwasan te lalag ne “Sit.”

<sup>27</sup> + 5:1-2: Hin 1:27-28.

<sup>28</sup> + 5:2: Mat 19:4; Mar 10:6.

inggimu rin sikandan ne iling kandin.  
<sup>2</sup> <sup>28</sup> Inggimu rin sikandan ne lukes  
 wey malitan wey impanalanginan  
 din sikandan wey ingngaranan din te  
 "Etew.") <sup>3</sup> Te 130 e ka idad ni Adan,  
 nakaanak pad sikandin te lukes ne  
 migsupu kandin ne ingngaranan din  
 ki Sit. <sup>4</sup> Pegkeetew ni Sit, neuyag  
 pad si Adan seled te walu ne gatus  
 (800) ne leg-un, wey nakaanak pad  
 man-e sikandin te me lukes wey me  
 malitan. <sup>5</sup> Miggunguma pad te 930  
 ka idad ni Adan ne hendue migpatey  
 sikandin.

6Te 105 e ka idad ni Sit,  
 nakaanak sikandin te lukes ne si Inus.  
<sup>7</sup> Pegkeetew ni Inus, neuyag pad si Sit  
 seled te 807 ne leg-un, wey nakaanak  
 pad man-e sikandin te me lukes wey  
 me malitan. <sup>8</sup> Miggunguma pad te  
 912 ka idad ni Sit ne hendue migpatey  
 sikandin.

9Te siyam e ne pulu (90) ka idad  
 ni Inus, nakaanak sikandin te lukes  
 ne si Kinan. <sup>10</sup> Pegkeetew ni Ki-  
 nan, neuyag pad si Inus seled te 815  
 ne leg-un, wey nakaanak pad man-e  
 sikandin te me lukes wey me malitan.  
<sup>11</sup> Miggunguma pad te 905 ka idad ni  
 Inus ne hendue migpatey sikandin.

12Te pitu e ne pulu (70) ka idad  
 ni Kinan, nakaanak sikandin te lukes  
 ne si Mahalalil. <sup>13</sup> Pegkeetew ni  
 Mahalalil, neuyag pad si Kinan seled  
 te 840 ne leg-un, wey nakaanak pad  
 sikandin te me lukes wey me malitan.  
<sup>14</sup> Miggunguma pad te 910 ka idad ni  
 Kinan ne hendue migpatey sikandin.

15Te hen-em e ne pulu wey  
 lalimma (65) ka idad ni Mahalalil,  
 nakaanak sikandin te lukes ne si  
 Harid. <sup>16</sup> Pegkeetew ni Harid,  
 neuyag pad si Mahalalil seled te 830  
 ne leg-un, wey nakaanak pad man-e  
 sikandin te me lukes wey me mali-  
 tan. <sup>17</sup> Miggunguma pad te 895 ka  
 idad ni Mahalalil ne hendue migpatey  
 sikandin.

18Te 162 e ka idad ni Harid,  
 nakaanak sikandin te lukes ne si Inuk.  
<sup>19</sup> Pegkeetew ni Inuk, neuyag pad si  
 Harid seled te walu ne gatus (800)  
 ne leg-un, wey nakaanak pad man-e  
 sikandin te me lukes wey me malitan.  
<sup>20</sup> Miggunguma pad te 962 ka idad ni  
 Harid ne hendue migpatey sikandin.

21Te hen-em e ne pulu wey lal-  
 imma (65) ka idad ni Inuk, nakaanak  
 sikandin te lukes ne si Mitusila. <sup>22</sup>  
 Te pegkeetew ni Mitusila, amana ne  
 talag-alukuy si Inuk te Manama seled  
 te tatelu ne gatus (300) ne leg-un, wey  
 nakaanak pad man-e si Inuk te me  
 lukes wey me malitan. <sup>23</sup> Purisu  
 miggunguma te 365 ka idad din. <sup>24</sup> <sup>29</sup>  
 Ne amana talag-alukuy si Inuk te Man-  
 ama. Nataman, warad e kitaa si Inuk  
 su imbatun e sikandin te Manama.

25Te 187 e ka idad ni Mi-  
 tusila, nakaanak sikandin te lukes ne  
 si Lamik. <sup>26</sup> Pegkeetew ni Lamik,  
 neuyag pad si Mitusila seled te 782  
 ne leg-un, wey nakaanak pad sikandin  
 te me lukes wey me malitan. <sup>27</sup>  
 Miggunguma pad te 969 ka idad ni Mi-  
 tusila ne hendue migpatey sikandin.

<sup>29</sup> + <sup>5:24:</sup> Hib 11:5; Hud 14.

28Te 182 e ka idad ni Lamik, nakaanak sikandin te lukes <sup>29</sup> wey migngaranan din sikandin ki Nuwi <sup>30</sup> su migkahi sikandin, “Seini ne bate ka egpakabulig kanta te keyirapan ta tenged te pegdilus te Magbebaye ne Manama te tane.” <sup>30</sup> Pegkeetew ni Nuwi, neuyag pad si Lamik seled te 595 ne leg-un, wey nakaanak pad man-e sikandin te me lukes wey me malitan. <sup>31</sup> Migginsuma pad te 777 ka idad ni Lamik ne hendue migpatey sikandin.

32Te miglalimme e ne gatus (500) ka idad ni Nuwi, nakaanak sikandin te tatelu ne lukes ne ensi Sim, si Ham, wey si Hapit.

Ka mareet ne me himu te me etew

<sup>6</sup> <sup>31</sup> Nataman, migmasalig e ka me etew kayi te ampew te tane, wey migmasalig e degma ka anak dan ne me malitan. <sup>2</sup> Te pegkakita te me anak te Manama ne mateles amana ka me mengebay, impangasawa ran e ka igkeupii ran. <sup>3</sup> Ne migkahi ka Magbebaye ne Manama, “Kena a egkeopian ne egkeuyag ka me etew te ware egtamanan, su etew re sikandan. Egbahanay ku naan de sikandan te 120 ne leg-un. Ne egkataman, egparusaan kud sikandan.” <sup>4</sup> <sup>32</sup> Te seeye ne timpu wey minsan pad te egpakinundul ne me leg-un, due me eleggasi kayi te ampew te tane. Sikandan ka me kabuhalan te seeye se me anak te Manama ne nakapangasawa te me mengebay. Ka me eleggasi ka me bahnai wey ka migbantug ne me etew te

dengan ne timpu.

<sup>5</sup> <sup>33</sup> Nakita te Magbebaye ne Manama ne egkanasnasion e ka mareet ne hinimuwan te me etew kayi te ampew te tane. Mareet layun ka langun ne egsumsumanen dan wey ka igkeupii ran. <sup>6</sup> Ne dutu, nekegsendit e ka Magbebaye ne Manama te neyimu rin ka etew kayi te ampew te tane, wey miglungku e sikandin. <sup>7</sup> Purisu migkahi e sikandin, “Egguleen ku kayi te ampew te tane ka me etew ne inggimu ku. Egguleen ku degma ka langun ne me mananap wey me manukmanuk su nekegsendit a te neyimu ku sikandan.” <sup>8</sup> Piru, due sabeka ne etew ne ingkahale te Magbebaye ne Manama, sikandin si Nuwi.

Ka peggimu ni Nuwi te arka

<sup>9</sup> <sup>34</sup> Seini ka pangguhuren meyitenged ki Nuwi. Matareng ne etew si Nuwi, ware igkarew-ey kandin te seeye ne timpu, wey talag-alukuy sikandan te Manama. <sup>10</sup> Ne due tatelu ne anak din ne ensi Sim, si Ham, wey si Hapit.

11Piru nakita te Manama ne mareet ka duma ne me etew, wey nekeempet e ka mareet ne hinimuwan dan kayi te ampew te tane. <sup>12</sup> Nakita rin ne mareet e ka kalibutan su subla ne mareet ka hinimuwan te langun ne etew.

13Ne migkahiyan te Manama si Nuwi, “Egguleen ku ka langun ne etew su nekeempet e ka mareet ne

<sup>30</sup> + **5:29** Ka “Nuwi”, hendue te Hibruwanen ne lalag ne iyan igpasabut se “liwang”.

<sup>31</sup> + **6:1-4:** Hub 1:6; 2:1.

<sup>32</sup> + **6:4:** Num 13:33.

<sup>33</sup> + **6:5-8:** Mat 24:37; Luk 17:26; 1Pid 3:20.

<sup>34</sup> + **6:9:** 2Pid 2:5.

hini muwan dan kayi te ampew te tane. Eggukuman ku sikandan duma te kalibutan. <sup>14</sup> Purisu, kuwa ka te kayu ne egngararanan te gupir wey himu ka te arka. Paninabengi nu naa ka seled, wey pamiketa nu ka seled wey ka lihawangan. <sup>15</sup> Himuwa nu seini ne 133 ne mitrus ka kalayat, daruwa ne pulu wey daruwa (22) ne mitrus ka kaluag, wey sapulu wey tatelu (13) ne mitrus ka katikang. <sup>16</sup> Atepi nu naa seini wey tukehi nu te liware te mitrus ka batang te lilliyungan. Himuwa nu seini ne tatelu ne andana wey himuwa nu te gumawan diye te kakiliran. <sup>17</sup> Egpasipukan ku ka kalibutan eyew egkahule ka langun ne miggeheyinawa. Egpatay ka langun, <sup>18</sup> pиру eggimu a te kasabutan duma keykew. Untud kew te arka se alungun duma te me anak nu wey te me asawa ran. <sup>19-20</sup> Paseded ka te arka te tigsabeka ne lunggunan te langun ne nakalkalasi ne mananap, me manuk-manuk, wey te langun ne egdul-ug. Eggendue sikandan te keykew eyew kene sikandan epgamatey. <sup>21</sup> Uyan ka man-e te nakalkalasi ne egkakeen wey itines nu eyew due egkakeen niyu wey te me mananap.” <sup>22</sup> <sup>35</sup> Ne intuman ni Nuwi ka langun ne insuhu kandin te Magbebeye ne Manama.

#### Ka pegasipuk te weyig

<sup>7</sup>Nataman, migkahiyan e te Magbebeye ne Manama si Nuwi, “Untud kew e se taltalaanak te arka, su te langun ne etew kayi te ampew te tane, sikeykew re ka nakita ku ne matareng. <sup>2</sup> Uyan ka te tigpitu ne lunggunan te langun ne nakalkalasi ne mananap

<sup>35</sup> + **6:22:** Hib 11:7.

<sup>36</sup> + **7:2** Ka “mananap ne malinis” ka mananap ne eleg ne igbehey te Manama.

<sup>37</sup> + **7:7:** Mat 24:38-39; Luk 17:27.

<sup>38</sup> + **7:11:** 2Pid 3:6.

ne in-isip ne malinis. <sup>36</sup> Piru ka me mananap ne in-isip ne malindit, tigsalimbeka re ne lunggunan uyana nu. <sup>3</sup> Uyan ka man-e te tigpitu ne lunggunan te langun ne nakalkalasi ne manuk-manuk te aw-awangan, eyew egkabuhal pad sikandan kayi te ampew te tane. <sup>4</sup> Te igkapitu ne aldew kuntee, egpeuranen ku te hep-at ne pulu (40) ne aldew wey hep-at ne pulu (40) ne karusileman eyew egpatey ka langun ne inggimu ku kayi te ampew te tane.” <sup>5</sup> Ne intuman ni Nuwi ka langun ne insuhu kandin te Magbebeye ne Manama.

<sup>6</sup>Te impasipukan ka kalibutan, hen-em e ne gatus (600) ka idad ni Nuwi. <sup>7</sup> <sup>37</sup> Ne mig-untud e te arka si Nuwi duma te asawa rin wey te me anak din duma te me asawa ran eyew kene epgamatey te pegasipuk te weyig. <sup>8</sup> Seeye se in-isip ne malinis wey ke malindit naa ne me mananap, me manuk-manuk, wey ka langun ne egdul-ug, <sup>9</sup> nekeglunggun sikandan ka nanguntud te arka duma ki Nuwi sumale te insuhu te Manama kandin. <sup>10</sup> Peglihad te pitu ne aldew, migbunsud e ka weyig ne migsipuk te kalibutan.

<sup>11</sup> <sup>38</sup> Te seeye ne timpu, hen-em e ne gatus (600) ka idad ni Nuwi. Te igkasapulu e wey pitu (17) ne aldew te igkarangeb ne bulan, naluwangan e ka langun ne sebseb wey nabusbus e ka langun ne weyig ne diye te langit. <sup>12</sup> Ne mig-uranan ka kalibutan seled te hep-at ne pulu (40) ne aldew wey hep-at ne pulu (40) ne karusile-

man. <sup>13</sup> Te aldew ne migbunsud e mig-uran, mig-untud e si Nuwi te arka duma te asawa rin wey ka tatelu ne me anak dan ne ensi Sim, Ham, wey Hapit wey ka me ambey ran. <sup>14</sup> Ne nanguntud degma duma kandan ka langun ne nakalkalasi ne mananap, ka me mahintalunan wey ka me ayam, ka me derakel wey mallilintek, wey ka langun ne nakalkalasi ne manuk-manuk. <sup>15</sup> Nekeglungun ka langun ne klasi te mananap ne induma ni Nuwi te mig-untud te arka, <sup>16</sup> sumale te insuhu te Manama. Nataman, inlekeban e te Magbebaye ne Manama ka gumawan te arka.

<sup>17</sup> Ware migkerit ka uran seled te hep-at ne pulu (40) ne aldew. Ne migdakel e ka weyig, wey mig-antew e ka arka. <sup>18</sup> Ne migpanaman-taman migtulin ka weyig wey migduu e, wey mig-antew-antew e ka arka diye te weyig. <sup>19</sup> Tenged te nasublaan e ka pegdakel te weyig, natimpaan e ka me bubungan kayi te ampew te tane, minsan me matikang. <sup>20</sup> Natimpaan ka puntul te me bubungan te me pitu ne mitrus. <sup>21</sup> Sikan naa ka nahule e ka langun ne eggeheyinawa—ka langun ne manuk-manuk wey ka langun ne mananap, mahintalunan wey ayam, wey ka langun ne etew. <sup>22</sup> Naamin nammatey ka eggeheyinawa kayi te ampew te tane. <sup>23</sup> Inggule te Magbebaye ne Manama ka langun kayi te kalibutan. Ne si Nuwi naan de wey ka me duma rin ne nekeuntud te arka ka ware nammatey. <sup>24</sup> Ne nabunbunan te weyig ka kalibutan seled te 150 ne aldew.

Ka pegtigkus te weyig

<sup>8</sup> Te seeye ne timpu, ware ded nalingawi te Manama ensi Nuwi wey

ka langun ne mananap ne duma rin diye te arka. Seeye naa, impakalamahan din ka kalibutan wey migbunsud e degma migtigkus ka weyig. <sup>2</sup> Ne insengseng din e ka langun ne sebseb wey ka langun ne imbayaan te weyig ne diye te langit, wey migkerit e ka uran. <sup>3</sup> Ne migpabulus migtigkus ka weyig. Te miggungume e te 150 ne aldew ka pegrupuk te weyig, <sup>4</sup> nakasanglad e ka arka diye te me bubungan diye te Ararat te igkasapulu wey pitu (17) ne aldew te igkapitu ne bulan. <sup>5</sup> Ne migpabulus migtigkus ka weyig taman te egkakite e ka puntul te me bubungan te an-anayan ne aldew te igkasapulu ne bulan.

<sup>6</sup> Te miglihad e ka hep-at ne pulu (40) ne aldew, inlukatan e ni Nuwi ka bintana te arka. <sup>7</sup> Ne dutu inlekaan din e ka sabeka ne uwak, wey miglayang-layang e seini taman te neetian e ka weyig. <sup>8</sup> Nataman inlekaan e man-e ni Nuwi ka sabeka ne selepati eyew egkanengnengan din ke mababew e ka weyig. <sup>9</sup> Piru ware egkalatunan te selepati su maralem pad ka weyig, wey miglibed e sikandin diye ki Nuwi diye te arka. Impalatun ni Nuwi ka selepati diye te belad din wey impaseled e diye te arka. <sup>10</sup> Ne migtetahad pad sikandin te pitu ne aldew, wey inlekaan din e man-e ka selepati. <sup>11</sup> Te egkasagkup e, miglibed e ka selepati ne migbange te meilem ne dewun te kayu ne ulibu! Sikan naa ka nakanengneng e si Nuwi ne mababew e ka weyig. <sup>12</sup> Nataman migtetahad pad man-e si Nuwi te lein ne pitu ne aldew. Ne inlekaan din e man-e ka selepati, wey warad seini miglibed.

13Te 601 e ka idad ni Nuwi, te an-anayan ne aldew te an-anayan ne bulan, neetiyan en iya ka weyig. Ne inlekat e ni Nuwi ka atep te arka wey migpamantew sikandin. Ne dutu, nakita rin ne nammare e ka tane!  
**14** Te igkararuwa ne pulu wey pitu (27) ne aldew te igkarangeb ne bulan, migmammare en iya ka tane.

15Ne migkahiyan te Manama si Nuwi, **16** “Lihawang kew e due te arka ka taltalaanak duma te me ambey nu. **17** Palihawanga nud degma ka langun ne mananap wey me manuk-manuk eyew egkabuhal wey egpekeempet kayi te ampew te tane.” **18** Seeye naa, miglihawang e ensi Nuwi ka taltalaanak duma te me ambey rin. **19** Ka langun ne mananap, ka me mahintalunan wey me ayam, wey ka langun ne me manuk-manuk, nanlihawang e degma te arka sumale te kandan ne klasiyan.

Ka pegpanubad ni Nuwi

20Ne miggimu si Nuwi te altar ne eg-unturan te egtutungen ne mananap, wey mig-angey sikandin te langun ne klasi te mananap wey manuk-manuk ne in-isip ne malinis. Intutung din seeye diye te altar isip igpanubad diye te Magbebaye ne Manama. **21** Te naarek e te Magbebaye ne Manama ka lansi, nahale sikandin wey migkahi diye te geyinawa rin, “Kene kud en iya egdilusen ka tane tenged te neyimu te me etew, minsan ke mareet iya ka suman-suman dan ligkat te bate pad sikandan. Kene kud e egguleen ka langun ne eggeheyinawa, iling te neyimu ku.

**22**“Taheed te duen pad kalibutan,

D uen pad timpu ne egpakapamula wey egpakaana,

D ue timpu ne maagsil wey due timpu ne meinit,

D ue degma timpu ne eggulabung wey due degma timpu ne eglengleng,

D ue maaldew wey due marusilem.

S eini se langun, kene egkataman.”  
 Ka kasabutan te Manama diye ki Nuwi

**9** <sup>39</sup> Impanalanganin te Manama si Nuwi wey ka me anak din wey migkahiyan, “Kabuhal kew eyew egpekeempet ka me kabuhalan niyu kayi te ampew te tane. **2** Egkenaaldek kaniyu ka langun ne mananap, me manuk-manuk, wey me ngalap. Sikaniyu ka egbuut kandan, **3** wey egpakakeen kew e kuntee due. Dengan, iyan ku re imbehey kaniyu ka me pinamula eyew egkeenen niyu. Piru kuntee, igbehey kud degma kaniyu seini se langun eyew egkeenen niyu. **4** <sup>40</sup> Piru kene kew en iya keen te mananap ne ware naawe ka langesa te peggimatey, tenged su ka langesa ka migligkatan te geyinawa. **5** Ke due etew ne eggimatey te etew, eglepparan ku sikandin. Ke due mananap ne eggimatey te etew, eglepparan ku degma sika. **6** <sup>41</sup> Minsan hentew ka eggimatey, eggimatayan degma sikandin.

<sup>39</sup> + **9:1:** Hin 1:28.

<sup>40</sup> + **9:4:** Lib 7:26-27; 17:10-14; 19:26; Diy 12:16,23; 15:23.

<sup>41</sup> + **9:6:** Iks 20:13; Hin 1:26.

Su inggimu te Manama ka etew ne nekeiling kandin.<sup>7</sup> <sup>42</sup> Ne sikaniyu, kabuhal kew naa eyew egpekeempet kew kayi te ampew te tane.”

8Ne migkahiyan te Manama ensi Nuwi wey ka me anak din,<sup>9</sup> “Kuntee, eggimu a te kasabutan duma keykew wey peendiye te langun ne kabuhalan niyu,<sup>10</sup> wey peendiye man-e te langun ne eggeheyinawa—ka me manuk-manuk wey me mananap—ka langun ne nanlihawang te arka duma kaniyu.<sup>11</sup> Seini ka kasabutan ne eggimuwen ku diye te kaniyu: Kene kud e egguleen ka langun ne eggeheyinawa pinaahi te pegpasipuk te weyig. Kene kud eg-abayan te egdereet ka kalibutan pinaahi te pegpasipuk te weyig.”<sup>12</sup> Ne migkahi e man-e ka Manama, “Ka palinneu te kasabutan ta wey te langun ne mananap, wey peendiye te egginguma ne me kabuhalan niyu,<sup>13</sup> iyan ka baluntu ne egpalepawen ku diye te me gapun. Sika ka palinneu te kasabutan ku kaniyu te nangugpe te kalibutan.<sup>14</sup> Tagse eglibulungen ku ka me gapun diye te aw-awangan ne egkakite e ka baluntu,<sup>15</sup> egsumsumanen ku ka kasabutan ta wey peendiye te langun ne mananap ne kenad en iya egkahule ligkat te pegpasipuk te weyig ka langun ne eggeheyinawa.<sup>16</sup> Emun ke eglepew e ka baluntu diye te me gapun, egpitawen ku seini wey egsumsumanen ku ka ware egtamanan ne kasabutan ta wey peendiye te langun ne eggeheyinawa kayi te ampew te tane.<sup>17</sup> Sika ka palinneu te inggimu ku ne kasabutan ta wey peendiye te langun ne eggeheyinawa kayi te ampew te tane.”

Ka me anak ni Nuwi

18Seini ka me anak ni Nuwi ne nanlihawang diye te arka—si Sim, si Ham wey si Hapit. (Si Ham ka amey ni Kanaan.)<sup>19</sup> Seini se tatelu ne anak ni Nuwi, iyan miglikatan te langun ne etew kayi te ampew te tane.

20Si Nuwi, talagbasukan wey sikandin ka an-anayan ne migpamula te paras.<sup>21</sup> Due timpu ne mig-inum sikandin te binu ne puun te paras, wey newubug e sikandin. Ne dutu, nakalipereng e sikandin diye te balungbalung din se migpalawas.<sup>22</sup> Ne nakita ni Ham ne amey ni Kanaan ka amey rin ne migpalawas. Sikan naa ka migkahiyan din e ka daruwa ne suled din diye te lihawangan.<sup>23</sup> Ne migkuwa si Sim wey si Hapit te manggad wey insampey ran diye te pamanayen dan. Ne mig-isues sikan-dan ka migseled diye te balungbalung ka migbunbun te amey ran. Warad iya sikandan miglilingey eyew kene dan egkakita ka amey ran ne migpalawas.<sup>24</sup> Nataman, te naalipaspasan e si Nuwi wey nanengnengan din e ka inggimu ni Ham ne igkalitan ne anak din,<sup>25</sup> migkahi e sikandin,

“ Egkarilus si Kanaan. Egkeyimu sikandin ne uripen te me suled din.”

26Ne migkahi man-e sikandin,  
“ Sayeen ka Magbebaye ne Manama,  
ka Manama ni Sim!

E gkeyimu ne uripen ni Sim si  
Kanaan.

27Egbuhalen te Manama si  
Hapit

<sup>42</sup> + 9:7: Hin 1:28.

w ey eglemung ka me kabuhalan din te me kabuhalan ni Sim.

N e egkeuripen degma ni Hapit si Kanaan.”

28Pegkapenga te pepsipuk te weyig, neuyag pad si Nuwi te 350 ne leg-un. <sup>29</sup> Ne migpatey sikandin te 950 e ka idad din.

Ka me kabuhalan te me anak ni Nuwi

(1 Kru. 1:5-23)

10Seini ka pangguhuren meyitenged te me kabuhalan te me anak ni Nuwi ne si Sim, si Ham, wey si Hapit. Nakaanak sikandan te napenge e ka pepsipuk te weyig.

2Ne seini ka me lukes ne anak ni Hapit—si Gumir, si Magug, si Maday, si Haban, si Tubal, si Misik, wey si Tiras. <sup>3</sup> Seini ka me lukes ne anak degma ni Gumir—si Askinas, si Ripat, wey si Tuggarma. <sup>4</sup> Seini ka me lukes ne anak ni Haban—si Ilisa, si Tarsis, si Kitim, wey si Dudanim. <sup>5</sup> Sikandan ka me kaapuan te me etew ne ne-keempet nangugpe diye te ilis te dahat wey diye te me pulu te dahat. Sikandan langun ka me kabuhalan ni Hapit ne nangugpe diye te nalein-lein ne me inged, wey nalein-lein e degma ka me tribu wey linalahan dan.

6Ne seini ka me lukes ne anak ni Ham—si Kus, si Ihuptu, si Put, wey si Kanaan. <sup>7</sup> Seini degma ka me lukes ne anak ni Kus—si Siba, si Habila, si Sabta, si Raama, wey si Sabtika. Ne seini degma ka me lukes ne anak ni Raama—si Siyiba wey si Didan. <sup>8</sup> Ne

duen pad man-e anak ni Kus ne egnaranan ki Nimrud, ne iyan an-anayan ne bahani kayi te ampew te tane <sup>9</sup> wey subla ne meinges ne mannitingen. Purisu, ke due meinges ne mannitingen, due degma lalahen ne eggenendue, “Egpekeiling seini ne etew ki Nimrud te meinges ne mannitingen.”

<sup>10</sup> Ka an-anayan ne me siyudad ne migmanduan ni Nimrud, iyan sika se Babil, Irik, wey Akad. Seini se tatelu ne siyudad sakup te inged ne egnaranan te Sinar. <sup>11</sup> Puun te seeye ne inged, miggendiye si Nimrud te Asirya wey migpasasindeg sikandin te me siyudad ne Ninibi, Rihubut-ir, Kala, <sup>12</sup> wey Risin ne diye te eletanan te Ninibi wey Kala, ka dakel ne siyudad.

13Si Ihuptu ka kaapuan te me matig-Ludim, me matig-Anamim, me matig-Lihabim, me matig-Naptuhim, <sup>14</sup> me matig-Patrusim, me matig-Kasluhim, wey me matig-Kapturim (ne miglikatan te me Pilistihan.)

15Ka panganey ne anak ni Kanaan iyan si Sidun, ne kaapuan te me Sidunihanen wey te me Hitihanen, <sup>16</sup> me Hibusihanen, me Amurihanen, me Girgasihanen, <sup>17</sup> me Hibihanen, me Arkihanen, me Sinihanen, <sup>18</sup> me Arbadihanen, me Simarihanen, wey te me Hamatihanen. Nataman, natalagtag e ka me tribu ne kabuhalan ni Kanaan, <sup>19</sup> wey nekeempet e sikandan nangugpe puun te Sidun peendiye te Girara taman te Gasa, peendiye man-e te Suduma, Gumura, Adma wey Sibuwim taman te Lasa. <sup>20</sup> Sikandan langun ka me kabuhalan ni Ham. Ne nalein-lein ne me inged ka nangugpaan dan wey nalein-lein degma ka me tribu wey linalahan dan.

21Ne ka kakey ni Hapit ne si Sim, iyan migligkatan te langun ne Hibruwanen. <sup>22</sup> Seini ka me lukes ne anak ni Sim—si Ilam, si Asur, si Arpaksad, si Lud, wey si Aram. <sup>23</sup> Seini degma ka me lukes ne anak ni Aram—si Us, si Hul, si Gitir, wey si Mas. <sup>24</sup> Ne si Arpaksad ka amey ni Sila, wey si Sila ka amey ni Ibir. <sup>25</sup> Ne si Ibir due daruwa ne anak ne me lukes. Si Pilig ka ngaran te sabeka su te timpu rin, nabaad ka keet-etawan te kalibutan. Ne si Huktan ka ngaran te suled din. <sup>26</sup> Ne si Huktan ka amey ni Almudad, ni Silip, ni Asarmabit, ni Hira, <sup>27</sup> ni Aduram, ni Usal, ni Dikla, <sup>28</sup> ni Ubal, ni Abimail, ni Siba, <sup>29</sup> ni Upir, ni Habila, wey ni Hubab. Sikandan langun ka me anak ni Huktan. <sup>30</sup> Diye sikan dan nangugpe te inged ligkat te Mista man te Sipar ne diye te me bubungan ne dapit te igsile. <sup>31</sup> Sikan dan langun ka me kabuhalan ni Sim. Ne nalein-lein ne me inged ka nangugpaan dan wey nalein-lein e degma ka me tribu wey linalahan dan.

32Sikandan langun ka me kabuhalan te me anak ni Nuwi ne neyimu ne nalein-lein ne me nasud sumale te me kaap-apuan dan. Te napenge e ka pagsipuk te weyig, natlagtag e sikandan minsan hendei.

Ka titikangi ne baley diye te Babil

11An-anayan, sabeka re ka linalahan te me etew kayi te ampew te tane. <sup>2</sup> Te nangalin e ka me etew ne egpuun diye te igsile, nekeuma sikan dan diye te maluag ne napu ne egnaranan te Sinar wey diyad e sikan dan nangugpe. <sup>3-4</sup> Ne migpalalahey sikandan ne miggendue, “Eggimu ki te siyudad ne due titikangi ne baley ne

egpekeuma diye te langit eyew egmabantug ka ngaran ta, wey eyew kene ki egmekegsuwey-suwey kayi te ampew te tane. Egpangimu ki te tisa ne egdalapen ta te hapuy eyew egmakehal.” Sikan naa ka migpangimu e sikandan te me tisa wey migkuwa te piket eyew egpegdeketen dan ka me tisa.

5Ne migpamanueg ka Magbebaye ne Manama eyew egleuy te siyudad wey te baley ne titikangi ne eggimuwen te me etew. <sup>6</sup> Ne migkahi ka Magbebaye ne Manama, “Pitew kew! Nasabeka ka seini ne me etew wey sabeka re ka linalahan dan. Ne seini se inggimu ran bunsuranan pad te egpangimuwen dan. Kene egkaluhay, egpekeyimu e sikandan te langun ne igkeupii ran. <sup>7</sup> Na,” kahi te Magbebaye ne Manama, “egpamanueg ki eyew egpegsewuhen ta ka linalahan dan eyew kene egpekegsabutey sikandan.” <sup>8</sup> Sikan naa ka impegusuwey-suwey e sikandan te Magbebaye ne Manama kayi te intiru ne kalibutan wey ware dan e nakabulus ka eggimu te siyudad. <sup>9</sup> Purisu Babil <sup>43</sup> ka ngaran te siyudad su diye libeha te Magbebaye ne Manama ka langun ne linalahan, wey diye migligkati ne impegusuwey-suwey rin sikandan kayi te intiru ne kalibutan.

Ka me kabuhalan ni Sim  
(1 Kru. 1:24-27)

10Ne seini ka me kabuhalan ni Sim. Te miglihad e ka daruwa ne leg-un te pagsipuk te weyig, mahatus (100) e ka idad ni Sim wey nakaanak e sikandin te lukes ne si Arpaksad. <sup>11</sup> Nataman, neuyag pad si Sim seled te

<sup>43</sup> + 11:9 Te Hibruwanen: “egkalibeg” ka kaluwasan te lalag ne “Babil.”

lalimma pad ne gatus (500) ne leg-un, wey nakaanak pad man-e sikandin te me lukes wey me malitan.

12Te tatelu e ne pulu wey lalimma (35) ka idad ni Arpaksad, nakaanak sikandin te lukes ne si Sila. <sup>13</sup> Nataman, neuyag pad si Arpaksad seled te 403 ne leg-un, wey nakaanak pad man-e sikandin te me lukes wey me malitan.

14Te tatelu e ne pulu (30) ka idad ni Sila, nakaanak sikandin te lukes ne si Ibir. <sup>15</sup> Nataman, neuyag pad si Sila seled te 403 ne leg-un, wey nakaanak pad man-e sikandin te me lukes wey me malitan.

16Te tatelu e ne pulu wey lalimma (35) ka idad ni Ibir, nakaanak sikandin te lukes ne si Pilig. <sup>17</sup> Nataman, neuyag pad si Ibir seled te 430 ne leg-un, wey nakaanak pad man-e sikandin te me lukes wey me malitan.

18Te tatelu e ne pulu (30) ka idad ni Pilig, nakaanak sikandin te lukes ne si Riyu. <sup>19</sup> Nataman, neuyag pad si Pilig seled te 209 ne leg-un, wey nakaanak pad man-e sikandin te me lukes wey me malitan.

20Te tatelu e ne pulu wey daruwa (32) ka idad ni Riyu, nakaanak sikandin te lukes ne si Sirug. <sup>21</sup> Nataman, neuyag pad si Riyu seled te 207 ne leg-un, wey nakaanak pad man-e sikandin te me lukes wey me malitan.

22Te tatelu e ne pulu (30) ka idad ni Sirug, nakaanak sikandin te lukes ne si Nahur. <sup>23</sup> Nataman,

neuyag pad si Sirug seled te daruwa ne gatus (200) ne leg-un, wey nakaanak pad man-e sikandin te me lukes wey me malitan.

24Te daruve e ne pulu wey siyam (29) ka idad ni Nahur, nakaanak sikandin te lukes ne si Tira. <sup>25</sup> Nataman, neuyag pad si Nahur seled te 119 ne leg-un, wey nakaanak pad man-e sikandin te me lukes wey me malitan.

26Te pitu e ne pulu (70) ka idad ni Tira, nakaanak sikandin te tatelu ne lukes ne ensi Abram, si Nahur, wey si Haran.

Ka me kabuhalan ni Tira

27Ne seini ka pangguhuren meiyitenged te me kabuhalan ni Tira. Si Tira ka amey enni Abram, Nahur wey ni Haran. Si Haran ka amey ni Lut, <sup>28</sup> wey diye migpatey si Haran te siyudad ne miglesutan din ne egnaranan te Ur ne sakup te me Kaldiya. Te pegpatey rin, neuyag pad mule ka amey rin ne si Tira. <sup>29</sup> Ne nakaasawe e si Abram ki Saray wey nakaasawe e si Nahur ki Milka ne anak ni Haran. Si Haran ka amey degma ni Iska. <sup>30</sup> Ne si Saray, ware mig-anak su kene egpakaanak sikandin.

31Mig-awe si Tira diye te siyudad te Ur ne sakup te me Kaldiya wey induma rin ka anak din ne si Abram wey ka ambey rin ne si Saray, wey ka apu din ne si Lut ne anak ni Haran. Eggendiye perem sikandan te inged ne Kanaan, piru te pegginguma ran diye te siyudad te Haran, diyad e sikandan mig-ugpe. <sup>32</sup> Ne diye namatey si Tira te Haran te 205 ka idad din.

Ka peg-umew te Manama ki Abram

12<sup>44</sup> Ne migkahi ka Magbebaye ne Manama ki Abram, “Engkeri nu ka inged nu, ka me karumaan nu, wey ka pamilya te amey nu, wey hendiye ka te inged ne igpakita ku keykew.<sup>2</sup> Eg-behayen ku sikeykew te masalig ne me kabuhalan eyew egkeyimu sikandan ne dakel ne nasud. Egpanalanganin ku sikeykew wey egmabantug ka ngaran nu eyew egkeyimu ka ne panalangin te langun.<sup>3</sup> <sup>45</sup> Egpanalanganin ku ka etew ne ebulig keykew, piru ka etew ne egdilus keykew, igdilus ku degma. Pinaahi keykew, egpanalanganin ku ka langun ne nasud kayi te am-pew te tane.”

4Sikan naa ka mig-awe e si Abram diye te Haran sumale te insuhu te Magbebaye ne Manama kandin wey migduma kandin si Lut. Te seeye ne timpu, pitu e ne pulu wey lalimma (75) ka idad ni Abram.<sup>5</sup> Induma ni Abram si Saray ne asawa rin, wey si Lut ne anaken din, wey in-uyan din ka langun ne karatuan dan wey me uripen ne nakuwa ran diye te Haran. Ne miglikat e sikandan ka eggendiye te inged te Kanaan.

T e nekeuma ran e diye te Kanaan,<sup>6</sup> migleus pad man-e ensi Abram diye te matulus ne kayu ne diye te Muri, marani te inged te Sikim. (Diye pad nangugpe ka me Kanaanen te seeye ne timpu.)<sup>7</sup> <sup>46</sup> Ne nataman, migpakita ka Magbebaye ne Manama ki Abram ne migkahi, “Seini ne tane ka igbehey ku te me kabuhalan nu.” Ne diye miggimu si Abram te altar ne eg-unturan te egtutungen ne igbe-

hey te Magbebaye ne Manama.<sup>8</sup> Nataman, miggalin e man-e sikandan diye te bubungan ne diye dapit te igsile ligkat te Bitil. Ne diye sikandan migtagtaheed mig-ugpe te eletanan te inged ne Bitil wey Ay. Ka Bitil dapit te iglineb wey ka Ay dapit te igsile. Ne miggimu e man-e diye si Abram te altar te Magbebaye ne Manama, wey diye sikandin mig-ampu.<sup>9</sup> Ne migpabulus pad man-e ensi Abram ka eggalin-halin peendiye te inged ne Nigib.

Si Abram diye te Ihiptu

10Te seeye ne timpu, due msumpit ne bitil diye te Kanaan. Sikan naa ka nakaleus pad man-e ensi Abram diye te Ihiptu eyew diye pad egtagtaheed eg-ugpe.<sup>11</sup> Te hapit e sikandin egpekeuma diye te inged te Ihiptu, migkahiyen din ka asawa rin ne si Saray, “Amana ka ne tetelesi ne malitan.<sup>12</sup> Ke egpakakita ka me matig-Ihiptu keykew, egkahi sikandan, ‘Asawa seini ni Abram.’ Ne eggimatayan ad nikandan, piru kene ka mule eggimatayan nikandan.<sup>13</sup> <sup>47</sup> Sikan naa, kahii nu sikandan te talaari ki eyew kena a nikandan eggimatayan, wey eyew egay-ayaran a nikandan te egsagsahipe tenged keykew.”<sup>14</sup> Te nekeume e si Abram diye te Ihiptu, nakita iya te me matig-Ihiptu ne mateles amana ka asawa rin.<sup>15</sup> Te nakakita kandin ka me upisyal te Paraun ne Hari te Ihiptu, ingkahiyen dan e ka Paraun ne Hari te mateles iya sikandin. Puun due, in-uyan e si Saray diye te palasyu te Paraun ne Hari te Ihiptu.<sup>16</sup> Tenged ki

<sup>44</sup> + 12:1: Him 7:2-3; Hib 11:8.

<sup>45</sup> + 12:3: Gal 3:8.

<sup>46</sup> + 12:7: Him 7:5; Gal 3:16.

<sup>47</sup> + 12:13: Hin 20:2; 26:7.

Saray, insagsahipe ay-ayari te Hari te Ihiptu si Abram wey impamehayan te me karniru, me kambing, me baka, me asnu, me kamil, wey me uripen.

17Piru puun su impeuyan te Hari te Ihiptu si Saray ne asawa ni Abram, impeyingumaan te Magbebeye ne Manama te subla ne makaaldek-haldek ne dalu ka Hari wey ka me sakup din diye te palasyu. <sup>18</sup> Ne nataman, impeumew e te Hari te Ihiptu si Abram wey mig-insaan, “Nekey-a seini se inggimu nu keddiey? Mania te wara a nikeykew kahii ne asawa nu bes sikandin? <sup>19</sup> Mania te migkahi ka ne talaari kew? Tenged due, impakuwa ku sikandin eyew eg-asaween ku. Na, seini red ka asawa nu, kua nud sikandin wey pangawe kew e!” <sup>20</sup> Migsuhu ka Hari te Ihiptu te me etew rin ne igparelrel e ensi Abram duma ka asawa rin wey ka langun ne kandin. Sikan naa ka impanulud dan e sikandan diye te lihawangan te Ihiptu.

Ka pegpasuwayey ni Abram ki Lut

13Sikan naa ka miglibed e man-e ensi Abram diye te inged te Nigib duma ka asawa rin wey si Lut wey ka langun ne kandin. <sup>2</sup> Meyaman ne subla si Abram. Masalig e ka me karniru rin, me kambing, me baka, me seleppi, wey me bulawan. <sup>3</sup> Puun te Nigib, miggalin-halin e man-e sikan-dan ka eg-ugpe taman te nekeuma sikandan diye te intagtaheeran dan dengan te eg-ugpe ne elat-elat te Bitil wey Ay. <sup>4</sup> Seeye ka inged ne miggimuan dengan ni Abram te altar. Diye man-e sikandin mig-ampu te Magbebeye ne Manama.

5Ne si Lut, ka migduma ki Abram, duen e degma pamilya rin wey me uripen din. Due degma me karniru rin, me kambing, wey me baka. <sup>6</sup> Tenged te suble e ne masalig ka me ayam ni Abram ki Lut, kenad eg-eleg ka me ayam dan te palayuranan ke eg-pekegdani sikandan ka eg-ugpe. <sup>7</sup> Sikan naa ka migpeehetey ka me talagtameng te me ayam ni Abram wey ka me talagtameng te me ayam ni Lut. Kenad ne eleg ka palayuranan te me ayam dan, su te seeye ne timpu diye pad degma nangugpe ka me Kanaanen wey me Pirisihanen.

8Purisu, migkahiyan ni Abram si Lut, “Kene ne meupiya ne egmeeg-ehetey ka me etew nu wey ka me etew ku tenged su anaken ku sikeykew. <sup>9</sup> Meupiya pad ke egpasuwayey ki su maluag mem pad seini se tane ne egkaayun ne eg-ugpaan. Na, alam ka te inged ne igkeupii nu te eg-ugpe, ke igkahibang naa wey ke igkakawanan. Ke eggendiye ka te igkakawanan, eggendiya a degma te igkahibang.” <sup>10</sup> <sup>48</sup> Sikan naa ka migpamantew si Lut wey nakita rin ne masalig ka me weyig diye te napu te Hurdan taman te Suar, ne nekeiling te pinamulaan te Idin wey nekeiling degma te inged ne Ihuptu. (Te seeye ne timpu, ware pad dereeti te Magbebeye ne Manama ka Suduma wey Gumura). <sup>11</sup> Purisu in-alam ni Lut ka langun ne napu te Hurdan wey miggipanew e sikandin peendiye te igsile. Iling due ne paahi ne nekegsuwey si Lut ki Abram. <sup>12</sup> Si Abram, diye mig-ugpe te inged te Kanaan, wey diye mig-ugpe si Lut te marani te Suduma ne diye te me siyudad diye te napu. <sup>13</sup> Ne ka me etew ne nangugpe diye te Suduma,

<sup>48</sup> + 13:10: Hin 2:10.

amana ne maddeet wey makasesale diye te Magbebaye ne Manama.

Ka peggalin ni Abram diye te Hibrun

14Te nakaligkat e si Lut, migkahiyan te Magbebaye ne Manama si Abram, “Pamantawa nu ayayari ka langun ne inged. <sup>15</sup> <sup>49</sup> Ka langun ne tane ne egkeumaan nu te egtengteng, igbehey kud keykew wey te me kabuhalan nu wey kaniyud e te ware egtamanan. <sup>16</sup> Egpamasuluhen ku ka kabuhalan nu iling kasulug te alinepung kayi te ampew te tane ne kene egkaseel. <sup>17</sup> Ne hapanew kad, leuya nu ka langun ne tane su igbehey kud keykew seini se langun.” <sup>18</sup> Nataman, miggalin e man-e si Abram wey diyad mig-ugpe marani te matulus ne me kayu ni Mamri diye te inged te Hibrun. Ne miggimu e man-e sikandin te altar ne eg-unturan te egtutungen ne igbehey diye te Magbebaye ne Manama.

Ka pegpangabang ni Abram ki Lut

14Te seeye ne timpu, due hep-at ne Hari ne migpakig-ehet te lalimma ne Hari. Seini ka hep-at ne Hari—si Amrapil ka Hari ne diye te Sinar, si Aryuk ka Hari te Ilasar, si Kadurlahumur ka Hari te Ilam, wey si Tidal ka Hari te Guyim. <sup>2</sup> Seini ka lalimma ne Hari ne migpakig-ehet kandan—si Bara ne Hari te Suduma, si Birsa ne Hari te Gumura, si Sinab ne Hari te Adma, si Simibir ne Hari te Sibuwim, wey ka Hari degma te Bila (wey ke Suar). <sup>3</sup> Ne migsabeka te keseg dan ka lalimma ne Hari diye te bangalug ne egngaranan te Sidim (ne egngaranan e kuntee te Namatey ne Dihat). <sup>4</sup> Su seled te sapulu wey

daruwa (12) ne leg-un, nasakup pad sikandan ni Hari Kadurlahumur. Piru nataman, te igkasapulu e wey tatelu (13) ne leg-un, migsukul e sikandan kandin.

5Te seup ne leg-un, miggigungume e ensi Kadurlahumur, ka duma rin ne me Hari wey ka me sundalu ran eyew egpakig-ehet kandan. Piru te an-anayan, migpakig-ehet pad ensi Kadurlahumur te lein ne me tribu wey migpanalu sikandan. Seini ka lein ne me tribu ne natalu ran—ka Ripaimhanen ne diye te Astarut Karnaim, ka me Susihanen ne diye te Ham, ka me Imihanen ne diye te napu te Kiryataim, <sup>6</sup> wey ka me Hurihanen ne diye te me Bubungan ne Siir. Ne diyad e nataman ensi Kadurlahumur ka migpanlupug kandan te Ilparan ne diye te ilis te disirtu. <sup>7</sup> Nataman, miglibed e ka hep-at ne Hari wey nekeendiyad te inged ne Kadis ne egngaranan dengan te Inmispat. Naahew ran ka langun ne inged te me Amalikanen wey natalu ran ka me Amurihanen ne diye mig-ugpe te Hasasun Tamar.

8Ne impalibulung te me Hari te Suduma, Gumura, Adma, Sibuwim, wey Bila ka me sundalu ran diye te bangalug ne egngaranan te Sidim. Ne migpakig-ehet e sikandan <sup>9</sup> ki Kadurlahumur ne Hari te Ilam wey te duma rin ne me Hari te Guyim, Sinar, wey Ilasar. Lalimma ne Hari ka migpakig-ehet te hep-at ne Hari. <sup>10</sup> Ne diye te bangalug ne egngaranan te Sidim, due sesalihi ne me bitu ne napenu te ispaltu. Te egpamallahuy e ka me Hari te Suduma wey Gumura wey ka me sundalu ran, due neneulug

<sup>49</sup> + 13:15: Him 7:5.

te me bitu wey due duma ne nakapallahuy diye te me bubungan. <sup>11</sup> Ne impanguwa te hep-at ne Hari ka langun ne diye te siyudad te Suduma wey Gumura, minsan ka langun ne egka-keen, wey nangipanew e sikandan. <sup>12</sup> Ne in-uyan dan degma ka anaken ni Abram ne si Lut ne diye mig-ugpe te Suduma, wey impanguyan dan ka langun ne karatuan din.

13Ne due nakapallahuy ne Hi-bruwanen ne migpanugtul ki Abram te indakep si Lut. Te seeye ne timpu, diye mig-ugpe si Abram te marani te matulus ne me kayu ni Mamri ne Amurihanen ne suled ni Iskul wey Anir. Egpepangpangabangey sikan-dan ki Abram. <sup>14</sup> Te nakarineg si Abram te indakep ka anaken din, inlibulung din e ka 138 ne nabasbas ne egpakiggira wey inlupug dan e ka hep-at ne Hari taman diye te inged ne Dan. <sup>15</sup> Hengkayi te marusilem e, imbaad-baad e ni Abram ka me etew rin wey inlusuran dan e ka me kundere dan wey natalu ran sikandan. Ne inlupug e enni Abram ka nakapallahuy taman diye te Huba ne diye te igkahibang ne balabahan te Damasku. <sup>16</sup> Ne nataman, naawi dan ded ka langun ne karatuan ne naahew te me kundere, wey naawi dan ded degma si Lut wey ka me karatuan din lagkes ka me malitan wey ka langun ne etew ne naddakep.

Ka pegpanalangin ni Milkisidik ki Abram

17Te nekeuli e si Abram puun te pegpanalu rin engki Kadurlahumur wey te duma rin ne me Hari, insinug-ung e sikandin te Hari te Suduma diye te bangalug ne egngegaran te Sabi.

<sup>50</sup> + **14:18-20:** Hib 7:1-10.

(Ne egngegaran degma te Napu te Hari.) <sup>18</sup> <sup>50</sup> Insinug-ung degma sikandin ni Milkisidik ne Hari te Salim wey talagpanubad degma te Amana ne Mabantug ne Manama. Mig-uyanan din te paan wey binu si Abram. <sup>19</sup> Ne impanalanginan din si Abram te migkahi,

“ Eghanalanginan si Abram te Amana ne Mabantug ne Manama ne miggimu te langit wey tane.

20Egdayanen ka Amana ne Mabantug ne Manama ne migbehey keykew te kapanaluwan diye te kunte- nu!” Ne imbehayan ni Abram si Milkisidik te igkasapulu ne baad te langun ne naawi din.

21Ne migkahiyan te Hari te Suduma si Abram, “Keykew e ka langun ne karatuan ne naawi nu. Piru iuli nu red keddi ka langun ne etew ku.”

22Piru migtabak si Abram, “Migsaad a te Magbebeye ne Manama, ka Amana ne Mabantug ne Manama ne miggimu te langit wey tane, <sup>23</sup> ne kena a egkuwa te minsan nekey ne keykew, minsan bula-bula wey ke hiket naa te sandal. Eyew kene ka eg-pakahi ne naratu a tenged keykew. <sup>24</sup> Ware minsan nekey ne egkuwen ku angin e te nakeen e te me etew ku. Piru pakua nu te me baad dan ka me duma ku ne ensi Anir, si Iskul, wey si Mamri.”

Ka pegsaad te Manama ki Abram

15Te ware naluhay, impaneng-neng si Abram te Magbebeye ne Manama wey migkahiyan,

“ Kene ka kaaldek Abram.

S ikeddi ka kalasag nu

w ey dakel ka ig-unag ku keykew.”  
<sup>2</sup> Piru mig-inse si Abram, “Magbebeye ne Manama, egmenuwen ku naa ka ig-unag nu keddi te ware mem pad anak ku? Si Iliisir e ne matig-Damasku ka egpakakamuney te karatuan ku ke egyptey ad. <sup>3</sup> Na, tenged te ware e ma nikeykew behayi te anak, seini se uripen ku ne miglesut kayi te baley ku ka egpakakamuney te karatuan ku.”

4Ne migkahiyan e man-sikandin te Magbebeye ne Manama, “Kene ne iyan egpakakamuney te karatuan nu ka uripen nu, ke kene, ka anak nu iya.” <sup>5</sup> <sup>51</sup> Ne in-uyan e sikandin te Magbebeye ne Manama diye te liyawangan wey migkahiyan, “Leng-ag ka diye te langit wey seela nu ka me bituen ke egpakaseel ke naa. Iling naa degma due kasulug ka me kabuhalan nu.”

6 <sup>52</sup> Migpalintutuu si Abram te Magbebeye ne Manama. Ne puun due, in-isip din ne matareng si Abram.

7Ne migkahiyan sikandin te Magbebeye ne Manama, “Sikeddi ka Magbebeye ne mig-uyan keykew ligkat te inged ne Ur ne sakup te me Kaldiya, eyew igbehey ku keykew ka seini ne tane.”

8Piru mig-inse si Abram, “Magbebeye ne Manama, egmenuwen ku naa te egnengneng ne keddiey en iya seini keureme?”

9Ne migtabak ka Magbebeye ne Manama, “Uyani a te baka ne ware pad anak, wey kambing, wey luke-san ne karniru ne neelin tigtatelu ne leg-un se idad, wey uyani a man-e te tukmu wey selepati.” <sup>10</sup> Ne impangyan seeye langun ni Abram diye te Manama, wey inggimatayan din ka tagse sabeka ne ayam wey impanuley rin seeye angin e te tukmu wey selepati. Ne immeg-andang din ka tagse suley. <sup>11</sup> Ne due me manuk-manuk ne miglene diye te impanuley rin ne me ayam eyew egkeen perem dutu, piru in-alew seeye ni Abram.

12 <sup>53</sup> Te hapit e eglined ka aldew, nakalipereng wey naalineknek si Abram, ne due makaaldek-haldek ne miggunguma kandin. <sup>54</sup> <sup>13</sup> <sup>55</sup> Ne migkahiyan sikandin te Magbebeye ne Manama, “Eggalin ka me kabuhalan nu diye te inged ne kene ne kandan. Diye egkeuripen sikandan wey egde-deehen seled te hep-at ne gatus (400) ne leg-un. <sup>14</sup> <sup>56</sup> Piru eglegparan ku ka nasud ne mig-uripen te me kabuhalan nu. Nataman, egpakaawe sikan-dan te seeye ne inged wey egpekeuyan sikandan te dakel ne karatuan. <sup>15</sup> Ne meytenged mule keykew, egkabuyag ke pad, wey egyptey ka keureme ne meupiya ka pglebeng keykew. <sup>16</sup> Ne ka me kabuhalan nu, wey e sikan-dan egpikalibed kayi ke egkatuman

<sup>51</sup> + <sup>15:5:</sup> Rum 4:18; Hib 11:12.

<sup>52</sup> + <sup>15:6:</sup> Rum 4:3; Gal 3:6; San 2:23.

<sup>53</sup> + <sup>15:12:</sup> Hub 4:13-14.

<sup>54</sup> + <sup>15:12</sup> Te Hibruwanen: due makaaldek-haldek ne durusilemi ne miggunguma kandin.

<sup>55</sup> + <sup>15:13:</sup> Iks 1:1-14; Him 7:6.

<sup>56</sup> + <sup>15:14:</sup> Iks 12:40-41; Him 7:7.

ka hep-at ne gatus (400) ne leg-un. Kene ku pad egdeldelen tenged te sale dan ka me Amurihanen ne mig-ugpe kayi, su kene pad eleg ne timpu ne eglegparan sikandan.”

17Te miglineb e ka aldew wey te migmarusilem e, sauhune ne due miglepew ne kuren ne mig-eebel wey sulu ne nalegleg. Ne diye seeye migbaye te elat te impanuley rin ne me ayam. <sup>18</sup> <sup>57</sup> Te seeye ne timpu, migsaad ka Magbebabe ne Manama ki Abram ne migkahi, “Igbehey ku te me kabuhalan nu seini se tane ligkat te weyig ne diye te Ihiptu taman te dakel ne Weyig ne Iyupratis. <sup>19</sup> Seini ka inged ne mig-ugpaan te me Kinihanen, me Kinishihanen, me Kadmunihanen, <sup>20</sup> me Hitihanen, me Pirishanen, me Ripaimhanen, <sup>21</sup> me Amurihanen, me Kanaanen, me Girgasihanen, wey me Hibusihanen.”

Ka talaanak ne si Hagar wey si Ismail

16Ne kene egpakaanak ka asawa ni Abram ne si Saray. Due uripen din ne matig-Ihiptu ne egnggaranan ki Hagar. <sup>2</sup> Ne migkahiyan ni Saray si Abram, “Puun su ware e ma behayi te Magbebabe ne Manama te anak, hendiyei nu ka uripen ku wey huliri nu sikandin. Kema ke egligkat kandin duen ded anak ku.” Ne intuman ni Abram ka ingkahi te asawa rin. <sup>3</sup> Purisu, te igkasapulu ne leg-un te pegugpe ni Abram diye te Kanaan, imparuwey e ni Saray kandin si Hagar. <sup>4</sup> Ne migguliran e ni Abram si Hagar wey nataman, naberes e sikandin. Te nanengnengan e ni Hagar ne egkaberis e sikandin, inleig-leig din e si Saray.

<sup>57</sup> + 15:18: Him 7:5.

5Ne migkahiyan ni Saray si Abram, “Sikeykew ka eleg ne egkasenditan te pgleig-leig ni Hagar keddi. Sikreddi ka migbehey kandin keykew, piru te nakanengneng din e ne egkaberis e sikandin, inleig-leig ad nikandin. Eggukum perem ka Magbebabe ne Manama ke hentew ka nakasale kayi, sikeykew naa wey ke sikeddi.”

6Ne migtabak si Abram, “Ke il-ing ma rue, iyan kad balahad kandin su uripen nu ma sikandin wey himuwa nu ke nekey ka igkeupii nu diye te kandin.” Nataman, in-ang-anggaan e ni Saray si Hagar, sikan naa ka migpal-lahuy e sikandin.

7Ne nakita si Hagar te panalihan te Magbebabe ne Manama te nekeuma rin e diye te sebseb ne diye te disirtu. Ka seeye ne sebseb diye te dalan peendiye te Sur. <sup>8</sup> Ne mig-inse ka panalihan kandin, “Hagar, uripen ni Saray, hendei ka egpuun wey hendei ka egpabulus?”

N e migtabak si Hagar, “Impalahuyan ku ka ahalen ku ne si Saray.”

9Ne migkahi ka panalihan te Magbebabe ne Manama, “Libed ka diye te kandin wey paruma-ruma ka kandin.” <sup>10</sup> Ne migkahi pad man-ka panalihan te Magbebabe ne Manama,

“ Egpamasuluhen ku ne subla ka kabuhalan nu wey kenad egkaseel sikandan.

11Kuntee, egkaberes ka wey te kene egkaluhay, eglesutan kad e te lukes. Ne iyan nu ingaran kandin si Ismail,<sup>58</sup>

**s** u narineg te Magbebeye ne Manama ka pegpeyid-u-hid-u nu.

12Piru eg-ugpe ka anak nu ne egpekeiling te mahintalunan ne asnu,

**e** g-ehetan din ka langun, wey ka langun, eg-ehet degma kandin.

**E** gdiyu-diyu sikandin te me suled din.”

13Ne nakakahi si Hagar diye te geyinawa rin, “Nakita ku ka Manama piru mania te wara a migpatey?” Se-eye naa ingngaranan din ka Magbebeye ne Manama ne migpakiglalag kandin te “Manama ne egpakkita.”<sup>59</sup>

**14** Purisu inggaranan te me etew ka belun te “Biirlahayrui”.<sup>60</sup> Ka sika ne belun, diye te eletanan te Kadis wey Birid.

15<sup>61</sup> Ne miglibed e si Hagar diye ki Saray. Nataman, miglesutan e sikandin te lukes wey ingngaranan ni Abram ka bate ki Ismail.<sup>16</sup> Te peglesut ni Ismail, walu e ne pulu wey hen-em (86) ka idad ni Abram.

Ka pegtuli ka palinneu te kasabutan

17Te siyam e ne pulu wey siyam (99) ka idad ni Abram, migpakita ka Magbebeye ne Manama kandin wey migkahi, “Sikeddi ka Manama ne Amana ne Maresen. Palintutuu ka keddi wey ugpe ka ne matareng.<sup>2</sup> Ne eggimuwen ku ka kasabutan ta te daruwa ne egpamasuluhen ku ka me kabuhalan nu.”<sup>3</sup> Te pegkarineg dutu ni Abram, miglangkeb e sikandin diye te tane. Ne migkahiyen sikandin te Manama,<sup>4</sup> “Seini ka kasabutan ku keykew: Egsaad a ne egkeyimu ka ne amey te masalig ne nasud.<sup>5</sup><sup>62</sup> Sikan naa ka kenad e ne si Abram ka ngaran nu su si Abraham<sup>63</sup> e, su eggimuwen ku sikeykew ne amey te masalig ne nasud.<sup>6</sup> Egpamasuluhen ku ka kabuhalan nu wey egmannenasud e sikandan, wey due duma kandan ne egkeyimu ne Hari.

**7**<sup>64</sup> “Egtumanen ku ka kasabutan ta wey peendiye te me kabuhalan nu, ne sikeddi ka Manama nu wey Manama te me kabuhalan nu. Kene egkataman ka seini ne kasabutan.<sup>8</sup><sup>65</sup> Igbehey ku keykew wey diye te me kabuhalan nu seini se tane ne intagtaheeran nu ugpei kuntee. Kaniyud e keureme seini se intiru ne tane te Kanaan te ware egtamanan, wey Manama ad nikaniyu.”

<sup>58</sup> + **16:11** Te Hibruwanen: “egpakkina ka Manama” ka kaluwasan te lalag ne “Ismail.”

<sup>59</sup> + **16:13** Te Hibruwanen: “ka Manama ne nakakita keddi” ka kaluwasan te lalag ne “Il Rui.”

<sup>60</sup> + **16:14** Te Hibruwanen: “ka belun te Manama ne nakakita keddi” iyan igapasabut te lalag ne “Biirlahayrui.”

<sup>61</sup> + **16:15:** Gal 4:22.

<sup>62</sup> + **17:5:** Rum 4:17.

<sup>63</sup> + **17:5** Te Hibruwanen: “amey te masalig” ka kaluwasan te lalag ne “Abraham.”

<sup>64</sup> + **17:7:** Luk 1:55.

<sup>65</sup> + **17:8:** Him 7:5.

9Ne migkahiyan e man-e te Manama si Abraham, “Ne iyan niyu degma katungdanan te me kabuhalan nu keureme, ka egtuman iya te kasabutan ku keykew.<sup>10</sup><sup>66</sup> Seini ka kasabutan ne egtulianen niyu, keilangan ne egtulian ka langun ne lukes due te kaniyu.<sup>11-12</sup> Ligkat kuntee, keilangan ne egtulian niyu ka me lukes ne walu pad ne aldew ligkat te peglesut dan. Ilagkes niyu degma ka me uripen ne miglesut diye te baley niyu, wey me uripen ne imbeli niyu diye te lein ne tribu. Sika ka palinneu te due kasabutan ta te daruwa wey te kabuhalan nu.<sup>13</sup> Keilangan ne egtulian ka tagse sabeka eyew due palinneu diye te lawa niyu te ware egtamanan ne kasabutan ta.<sup>14</sup> Ka ware migpatuli, keilangan ne egdeldelen su ware sikandin migtuman te kasabutan.”

15Ne migkahiyan pad man-e te Manama si Abraham, “Ka asawa nu, kene nud e ngarani ki Saray, su si Sara e ka ingaran nu.<sup>16</sup> Egpanalanginan ku sikandin wey egbehayan ku sikekyew te anak ne lukes pinahi kandin. Egkeyimu sikandin ne iney te masalig ne nasud, wey due me kabuhalan din ne egkeyimu ne Hari.”

17Ne mig-usengul si Abraham diye te tane. Piru nakangisi sikandin ne migkahi diye te geyinawa rin, “Eg-pakaanak e naan pad te mahatus (100) man e ka idad ku? Eg-anak naan pad si Sara te siyam man e ne pulu (90) ka idad din?”<sup>18</sup> Ne migkahiyan din ka Manama, “Meupiya perem ke si Ismail en iya ka egpakakuwa te karatuan ku.”

19Piru migtabak ka Manama ne miggendue, “Kene, su egpakaanak iya ka asawa nu ne si Sara te lukes wey ngarani nu sikandin ki Isaak.<sup>67</sup> Ne ka kasabutan ku keykew, igpabulus ku diye ki Isaak wey diye te me kabuhalan din te ware egtamanan.<sup>20</sup> Piru si Ismail, narinig ku ka pegpeyim-mimenew nu meytenged kandin. Egpanalanginan ku degma sikandin, wey egbehayan ku te masalig ne anak wey egkabuhal-buhal. Egkeyimu sikandin ne amey te sapulu wey daruwa (12) ne pangulu wey eggimuwen ku degma ne dakel ne nasud ka me kabuhalan din.<sup>21</sup> Piru ka kasabutan ta mule te daruwa, diye de egkatuman te anak nu ne si Isaak ne ig-anak ni Sara te iling kayi ne timpu te seup ne leg-un.”<sup>22</sup> Te nekeimpus e ka Manama ne miglalag ki Abraham, mig-awe e sikandin.

23Te seeye de iya ne aldew, intuman e ni Abraham ka insuhu te Manama kandin. Intulian din e ka anak din ne si Ismail wey ka langun ne uripen din—ka me lukes ne miglesut diye te baley rin wey ka impameli rin.<sup>24</sup> Te siyam e ne pulu wey siyam (99) ka idad ni Abraham ne henduen pad ne natulian sikandin,<sup>25</sup> wey sapulu e wey tatelu (13) ka idad ni Ismail ne natulian degma sikandin.<sup>26</sup> Te seeye ded ne aldew ne intulian ensi Abraham wey si Ismail<sup>27</sup> lagkes ka langun ne me uripen.

Ka pegsaad te Manama ne egpaanaken si Sara te lukes

18Te ware naluhay, migpakte e man-e ka Magbebaye ne Manama ki Abraham diye te matulus ne me kayu

<sup>66</sup> + **17:10:** Him 7:8; Rum 4:11.

<sup>67</sup> + **17:19** Te Hibruwanen: ka lalag ne “Isaak” iyan igpasabut ka “egpakangisi sikandin.”

ni Mamri. Te seeye ne timpu, nekeuntud e ka aldew wey diye migpinpinnuu si Abraham te gumawan te balungbalung din.<sup>2</sup><sup>68</sup> Pegpitew ni Abraham diye te kewun-aan, iyan din en iya seini se tatelu ne etew ne migsasindeg. Sikan de iya ne migpalahuy e si Abraham ka migsinug-ung kandan. Ne miglangkeb sikandin diye te tane<sup>3</sup> wey migkahi, "Ahalen, ke egkaayun ne tulan kew pa ubag kayi te kanami."<sup>4</sup> Egpaangey a te weyig eyew egpakanpanlu-lu kew te me paa niyu, wey himeley kew pa kayi te egdalungan te kayu.<sup>5</sup> Eg-anney a man-e te egkakeen eyew egmanekal kew ka egpabulus te peggipanew niyu, su igkahale ku ka pegsendad kaniyu taheed te kayi kew te ugpaan te suluhanen niyu."

Ne migtabak sikandan, "Ne uya, iyan kad e balahad."

6Sikan de iya ne migdagdahew si Abraham ne miglibed diye te balungbalung din wey migkahiyan din si Sara, "Apas ka kuwa te senge-saku ne subla ne meupiya ne harina wey hilutu ka te paan."<sup>7</sup> Ne migdagdahew pad man-e si Abraham mgleus diye te me ayam din wey mig-alam sikandin te nati ne baka ne malambu. Ne imparagdahawan din seeye ipalape wey ipeylitu te suluhanen din.<sup>8</sup> Nataman, migkuwa degma si Abraham te malamismis ne gatas wey iyam ne gatas. Ne insedad din e seeye diye te tatelu ne etew duma te ngalap ne impeyilatu din. Ne diye de migesesasindeg si Abraham te lenged

dan taheed te egmangeeken sikandan diye te egkaralungan te kayu.

9Ne mig-insaan dan si Abraham, "Hendei ka asawa nu ne si Sara?"

Ne migtabak sikandin, "Duen ded te seled te balungbalung."

10<sup>69</sup> Due sabeka kandan ne migkahi, "Eglibed a kayi te seup ne leg-un te iling kayi ne timpu, wey ka asawa nu ne si Sara duen e anak ne lukes."

Ne diye si Sara te gumawan te balungbalung ne egkeinniyuhan ni Abraham ka migpammineg.<sup>11</sup> Buyag e amana ka alunggun ne si Abraham wey si Sara, wey kenad ebulanen si Sara.<sup>12</sup><sup>70</sup> Sikan naa ka nakangisi si Sara ne migkahi diye te geyinawa rin, "Kuntee te buyag ad wey buyag e degma ka asawa ku, egkeupian e naan pad ne egpakkigulid kandin eyew egpakaanak key pad?"

13Ne mig-insaan te Magbebaye ne Manama si Abraham, "Mania te nakangisi si Sara ne migkahi, 'Egpakaanak e naan pad minsan buyag ad?'"<sup>14</sup><sup>71</sup> Duen naa kene egkeyimu te Magbebaye ne Manama? Te peglibed ku kayi te seup ne leg-un te iling kayi ne timpu, ka asawa nu ne si Sara duen e anak ne lukes."

15Piru migpahunware si Sara su naaldek sikandin wey migkahi, "Ti! Wara a nakangisi ne."

<sup>68</sup> + **18:2a:** Hib 13:2.

<sup>69</sup> + **18:10:** Rum 9:9.

<sup>70</sup> + **18:12:** 1Pid 3:6.

<sup>71</sup> + **18:14:** Luk 1:37.

P iru migtabak ka Magbebeye ne Manama, “Ti! Nakangisi ka iya ne.”

Ka pegpeyid-u-hid-u ni Abraham meyitenged te Suduma

16Nataman, miggipanew e katatelu ne etew. Ne impanulud sikan-dan ni Abraham diye te egpakapantew te inged ne Suduma eyew te peg-paligkat kandan. <sup>17</sup> Ne migkahi ka Magbebeye ne Manama diye te geyin-nawa rin, “Kene ku igkees ki Abraham ka eggimuwen ku. <sup>18</sup> Egne-nasud te dakel ka me kabuhalan din wey egkeyimu ne mabantug. Ne eg-panalanginan ku ka langun ne nasud kayi te ampew te tane pinaahi kandin. <sup>19</sup> In-alam ku sikandin eyew igtatuman din te me anak din wey te me kabuhalan din keureme ka me suhu ku ne eggimu sikandan te matareng wey eleg ne peggukum. Ne puun due, egkatuman ka langun ne insaad ku kandin.”

20Ne migkahiyan te Magbebeye ne Manama si Abraham, “Nasublaan e ka sumbung meyitenged te Suduma wey Gumura, wey dakel e amana ka sale dan. <sup>21</sup> Sikan naa ka egtupang a eyew egleuyen ku ke malehet ka sum-bung ne narineg ku.”

22Ne mig-awe e mule ka daruwa ne etew wey miggendiyad te Suduma, piru migpalunggehaat ka Magbebeye ne Manama duma ki Abraham. <sup>23</sup>

Migdani-rani si Abraham te Mag-bebeye ne Manama wey mig-inse, “Egguleen nu naa te egpangimatey ka matareng duma te makasesale? <sup>24</sup>

Ke due lalimma ne pulu (50) ne etew ne matareng diye te siyudad, egdereetan nu naa ka intiru ne siyudad? Kene nu naa igkeyid-u ka siyudad tenged

kandan? <sup>25</sup> Kene nu iya egkey-imu ka peggule te matareng duma te makasesale. Kene egkaayun ne egpekeg-ililing ka eggimuwen nu te me matareng wey te me makasesale. Su ka talaggukum te langun kayi te am-pew te tane, keilangan ne eggimu ke nekey ka eleg.”

26Ne migkahi ka Magbebeye ne Manama, “Ke egpakkita a te lalimma ne pulu (50) ne etew ne matareng diye te Suduma, kene kud egdereetan ka intiru ne siyudad tenged kandan.”

27Ne migkahi e man-e si Abraham, “Magbebeye ne Manama, kene ke re keenendueni te egpabulus a ka eg-inse keykew, minsan etew e re ne ware katenged ne eg-inse keykew kayi. <sup>28</sup> Ke duen naan de hep-at ne pulu wey lalimma (45) ne etew ne matareng diye, egdereetan nu naan ded ka intiru ne siyudad minsan nasalinan de te lalimma ne etew ne matareng?”

N e migtabak ka Magbebeye ne Manama, “Kene ku egdereetan ka siyudad ke egpakkita a te hep-at ne pulu wey lalimma (45) ne etew ne matareng.”

29Ne mig-inse e man-e si Abraham, “Ke duen naan de hep-at ne pulu (40) ne etew ne matareng?”

N e migtabak ka Magbebeye ne Manama, “Ke due hep-at ne pulu (40), kene ku egdereetan ka intiru ne siyudad tenged kandan.”

30Ne migkahi e man-e si Abraham, “Magbebeye ne Manama, kene ke re kabelu te egpabulus a ne eg-inse.

Ke duen naan de tatelu ne pulu (30) ne matareng?”

N e migtabak sikandin, “Kene ku egdereetan ka intiru ne siyudad ke due egkakita ku ne tatelu ne pulu (30) ne etew ne matareng.”

31Ne migkahi e man-e si Abraham, “Magbebabe ne Manama, kene ke re keenendueni te egpabulus-bulus a ne eg-inse keykew. Ke duen naan de daruwa ne pulu (20) ne etew ne matareng ne egkakita nu?”

N e migtabak ka Magbebabe ne Manama, “Kene ku red man-e egdereetan ka intiru ne siyudad tenged kandan te daruwa ne pulu (20).”

32Ne migkahi e man-e si Abraham, “Magbebabe ne Manama, kene ke re iya kabelu su duen pad katanan ne inse ku keykew. Ke sapulu naan de ka egkakita nu ne etew ne matareng?”

N e migtabak ka Magbebabe ne Manama, “Kene ku red iya man-e egdereetan ka intiru ne siyudad tenged kandan te sapulu.” <sup>33</sup> Te nekeimpus e sikandin ka migeglalahey, mig-awe e ka Magbebabe ne Manama wey miguli e degma si Abraham.

Ka pegkamakasesale amana te me etew diye te Suduma

19Te miggungume e seeye se daruwa ne lukes ne panalihan te Manama diye te Suduma te sika ne karusileman, diye migpinpinnuu si Lut te gumawan te siyudad. Te

pegkakita rin kandan, migsasindeg e sikandin ka migsinug-ung kandan wey miglangkeb diye te tangkaan dan <sup>2</sup> wey migkahi, “Me ahalen, eghangyu a kaniyu ne tulan kew pa ubag kayi te baley ku. Egpakapanlu-lu kew te paa niyu wey egpekeyirehe pad. Ne kaasellem, egpakaselem-selem kew te peggiapanew niyu.”

P iru migtabak sikandan, “Kene key, su diye key re eggirehe te plasa.” <sup>3</sup> Piru mapahetpet ka peggingat ni Lut kandan, sikan naa ka nabennalan ded sikandan wey miggendiyad e te baley rin. Migpeylulu si Lut te meupiya ne iglabung ne due paan ne ware patulin. Ne nataman, miglabung e sikandan.

4Te ware pad miglipereng ka me mahaliyug ni Lut, due nanginguma ne masalig ne me kanakan wey me buyag ne matig-Suduma wey miglingkusan dan ka baley ni Lut. <sup>5</sup> <sup>72</sup> In-umew ran si Lut wey mig-insaan, “Hendei naan e ka me lukes ne miggunguma kayi te baley nu? Ipalihawang nu sikandin kayi eyew eggilabetan ney sikandan.”

6Ne inlihawangan ni Lut ka me etew, wey inlekeban din dagdahawi ka gumawan. <sup>7</sup> Ne migpeyid-u-hid-u sikandin te me etew ka miggendue, “Me suled ku, kene niyu re ubag himuwa ka mareet ne nasuman-suman niyu! <sup>8</sup> Ke egkeupian kew, due daruwa ne anak ku ne mengebay. Igpalihawang ku sikandin kayi te kaniyu wey sikaniyud e ka balahad ke nekey ka eggimuwen niyu kandan. Piru kene niyu hilabeti seini se me lukes su mahaliyug ku sikandan

<sup>72</sup> + 19:5-8: Tal 19:22-24.

wey keilangan ne egpangabangan ku sikandan.”

9Piru migtabak sikandan, “Awe kad seini se lapu de! Kene ka ambag-ambag kanami su kema ke subla pad ne mareet ka eggimuwen ney keykew du te kandan.” Nataman, intuku dan si Lut wey migdani-rani e sikandan eyew egguhusen dan e perem ka lekeb. <sup>10</sup> Piru miglulukat ka daruwa ne panalihan diye te seled wey inganuy ran e si Lut wey inlekeban dan e ka gumawan. <sup>11</sup> <sup>73</sup> Ne impamutud dan ka langun ne etew diye te lihawangan eyew kenad e egpakatulitu te gumawan.

Ka peg-awe enni Lut te Suduma

12Ne mig-insaan te daruwa ne panalihan si Lut, “Due me karumaan nu, me anak wey ke mekaamung nu naa ne mig-ugpe kayi te seini ne siyudad? Ke due, dumaa nu sikandan wey pangawe kew e kayi, <sup>13</sup> su egdereetan ney ka seini ne inged. Narineg te Magbebaye ne Manama ka dakel ne sumbung meytenged te me etew ne mig-ugpe kayi, wey impeuyan key nikandin eyew egdereet te seini ne siyudad.”

14Sikan de iya ne miggendiyaan e ni Lut seeye se egpangasawa te me anak din wey migkahiyan din sikandan, “Apas kew awe kayi kuntee su egdereetan te Magbebaye ne Manama ka seini ne siyudad.” Piru kahiyen dan ne kawalian de seeye ni Lut.

15Te egpamalat-palat e, indalusung e te me panalihan si Lut te

migkahi, “Mahaan ka! Pangawe kew e kayi wey dumaa nu ka asawa nu wey ka daruwa ne anak nu eyew kene kew egpakkalagkes te pegdereet te seini ne siyudad.” <sup>16</sup> <sup>74</sup> Piru miglamalamu si Lut. Sikan naa ka impehes e ganuya te daruwa ne panalihan si Lut, ka asawa rin, wey ka daruwa ne anak din, wey migdumaan e sikandan te miglihawang te siyudad su neyid-u ka Magbebaye ne Manama kandan. <sup>17</sup> Te nakalihawang e sikandan, migkahi ka sabeka ne panalihan, “Pallahuy kew e! Kene kew lilingey wey kene kew sanggel kayi te napu. Diye kew aput te me bubungan eyew kene kew egkapatey.”

18Piru migtabak si Lut, “Kene de ubag ne diye, ahalen! <sup>19</sup> Neyid-u kew keddi wey migpangabangan a nikaniyu, piru kena a egpekeendiye te me bubungan su mariyu amana. Kema ke egkasapenan a te karereetan te kene e pad egpekeuma diye, ne egpatey ad. <sup>20</sup> Nakita nu sika se deisek ne lungsud sika te kewun-aan? Marani re sika ne eg-aputan. Egkaayun ubag ne dutun e re eg-aput eyew egkaluwas e red?”

21Ne migtabak ka panalihan, “Uya, nabennalan a te inhangyu nu keddi. Kene ku re iglagkes te egdereet ka seeye ne lungsud. <sup>22</sup> Na, Pallahuy kew e! Su ware egkeyimu ku ke kene kew pad egpekeuma diye.”

P urisu, ingngaranan te Suar <sup>75</sup> ka seeye ne lungsud su migkahi ma si Lut te deisek de sika.

<sup>73</sup> + **19:11:** 2Har 6:18.

<sup>74</sup> + **19:16:** 2Pid 2:7.

<sup>75</sup> + **19:22:** Te Hibruwanen: “deisek” ka kaluwasan te lalag ne “Suar.”

Ka pegdereet te Suduma wey Gu-mura

23Migsile e ka aldew te nekeuma si Lut diye te Suar. <sup>24</sup>

<sup>76</sup> Ne impeuranan e te Magbebaye ne Manama te batu ne egkalegleg ne egngaranan te asupri ka Suduma wey Gumura, <sup>25</sup> wey indereetan te Magbebaye ne Manama ka langun ne diye te napu, wey inlagkes din ka me etew wey me pinamula te seeye ne inged. <sup>26</sup> <sup>77</sup> Piru miglilingey mule ka asawa ni Lut ne migsinundul kandin, sikan naa ka migbaluy e sikandin ne sungkaleg ne asin.

27Te napawe e, migselem-selem si Abraham miggendiye te migsasindehan dan te Magbebaye ne Manama.

<sup>28</sup> Impamantew rin ka Suduma wey Gumura wey ka intiru ne napu, wey nakita rin ka ebel ne migtiptipuuk ne nekeempet te napu ne hendue te egpuun te dakel ne insugnuwan. <sup>29</sup> Te pegdereet te Manama te me siyad ne mig-ugpaan ni Lut, ware din lingawi ka inlalag din ki Abraham su impepallahuy rin mem pad si Lut.

Ka migligkatan te me Muwabiha-nen wey me Amunihaen

30Piru naaldek si Lut ne egugpe diye te Suar. Purisu, miggalin e sikandin duma te daruwa ne anak din diye te bubungan wey diyad sikan-dan mig-ugpe te sulung. <sup>31</sup> Nata-man, migkahiyan te kakey ka hari rin, "Egkabuyag e ka amey ta wey ware lukes te seini ne inged ne eg-asawa kanta iling te duma ne etew kayi te ampew te tane. <sup>32</sup> Na, egpewubuhan

ta ka amey ta eyew egpekewulid ki kandin wey egpakaanak kid pinaahi kandin." <sup>33</sup> Te seeye ne karusileman, impewubuhan dan e ka amey ran wey miggulid e ka kakey. Piru ware nakanengneng si Lut su newubug amana sikandin.

34Te seup e ne aldew, migkahiyan te kakey ka hari rin, "Miggulid ad te amey ta gabii te marusilem. Kangkuwan naa te marusilem, egpewubuhan tad man-e sikandin wey sikeykew e degma hulid eyew egpakaanak ki se daruwa pinaahi kandin." <sup>35</sup> Te seeye ne karusileman, impewubuhan dan e man-e ka amey ran wey miggulid e degma ka hari. Piru ware man-e nakanengneng si Lut su newubug amana sikandin. <sup>36</sup> Puun due, naberes e sikandan se daruwa pinaahi te amey ran ne si Lut. <sup>37</sup> Nataman, nakaanak e ka kakey te lukes ne migngaranan din ki Muwab. Sikandin ka migligkatan te tribu ne egngaranan e te Muwabihanan kuntee. <sup>38</sup> Ka hari, nakaanak degma te lukes ne migngaranan din ki Bin-ami. Sikandin degma ka migligkatan te tribu ne egngaranan e te Amunihaen kuntee.

Si Abraham wey si Abimilik

20Ne mig-awe e ensi Abraham diye te Mamri wey miggalin e diye te inged te Nigib wey diye sikandan mig-ugpe te eletanan te Kadis wey Sur. Te katammanan, miggendiayd e sikandan te inged ne egngaranan te Girara. <sup>2</sup> <sup>78</sup> Te diye dan e, ingkahiyan ni Abraham ka me mahinged te atebey rin si Sara. Sikan naa ka im-

<sup>76+</sup> <sup>19:24-25:</sup> Mat 10:15; 11:23-24; Luk 10:12; 17:29; 2Pid 2:6; Hud 7.

<sup>77+</sup> <sup>19:26:</sup> Luk 17:32.

<sup>78+</sup> <sup>20:2:</sup> Hin 12:13; 26:7.

paangey ni Abimilik ne Hari te Girara si Sara.<sup>3</sup> Te sabeka ne karusileman, migpakita ka Manama ki Abimilik pinaahi te taheinep wey migkahi, “Egkapatey ka su impaangey nu sika se malitan ne mangiasawe e.”

4Piru ware pad newuliri ni Abimilik si Sara, sikan naa ka migkahi sikandin, “Magbebaye ne Manama, eggimatayan e naa nikeykew wey ka me etew ku minsan ware sale ney?”<sup>5</sup> Migkahi ma nahud si Abraham te atebey rin si Sara, wey migkahi degma si Sara te maama rin si Abraham. Sikan naa ka neyimu ku sika ne ware mareet ne tuyu, wey wara a nakasale.”

6Ne migtabak ka Manama, “Malehet ne ware mareet ne tuyu nu te peggimu kayi. Purisu, ware ku tuhuti ne egkewuliran nu sikandin eyew kene ka egpakasale kayi te keddi.”<sup>7</sup> Piru kuntee, iuli nud ka malitan diye te asawa rin su prupita sikandin ne eg-pangguhud te lalag ku, ig-ampu ka nikandin eyew kene ka egkapatey. Piru ke kene nu ig-uli ka malitan, egpanpanayan ku sikeykew ne egkapatey ka iya wey ka langun ne sakup nu.”

8Ne migselem-selem migbangun-bangun si Abimilik wey impeumew rin e ka langun ne suluhuanen din wey ingkahiyen din meytenged te taheinep din wey nenaaldek amana sikandan.<sup>9</sup> Ne impeumew ni Abimilik si Abraham wey mig-insaan, “Mania te inggimu nu seini kanami? Nekey-a ka mareet ne neyimu ku keykew mania te in-uyanan a nikeykew te subla ne egpakarereet keddi wey te inged ku? Kene ne eleg ka inggimu nu keddi.<sup>10</sup> Mania te inggimu nu seini?”

11Ne migtabak si Abraham, “Inggimu ku seini su kahiyen ku ne warad iya minsan sabeka kayi ne egkaaldek te Manama, wey nekeisip a ne kema ke eggimatayan a nikaniyu eyew egkaahew niyu ka asawa ku.”<sup>12</sup> Malehet iya ne atebey ku sikandin, su sabeka re ka amey ney, piru lein ka iney rin weylein degma ka iney ku, ne in-asawa kud sikandin.<sup>13</sup> Te im-paawa ad te Manama diye te baley te amey ku, ingkahiyen ku si Sara, ‘Minsan hendei ki egbaye, kahi ka ne talaari ki. Te sika ne paahi, igpakapaitew nu ka geyinawa nu keddi.’”

14Ne in-uli e ni Abimilik si Sara diye ki Abraham wey impamehayan din pad man-e sikandin te me karniru, me baka, wey me uripen ne lukes wey malitan.<sup>15</sup> Ne ingkahiyen din e si Abraham, “Pitawa nu ka intiru ne tane ku wey egkaayun ka ne eg-ugpe minsan hendei ne igkeupii nu.”<sup>16</sup> Ne migkahiyen din degma si Sara, “Egbehayan ku ka maama nu te sabeka ne libu (1,000) ne pelata ne mahal. Sika ka pamalehet te langun ne duma nu ne ware ku sikeykew nalibuhi eyew egkanengnengan te langun ne ware ka nekeyimu te mareet.”

17-18Tenged te peg-anney ni Abimilik ki Sara ne asawa ni Abraham, imbuutan te Magbebaye ne Manama ne kenad eg-anak ka me malitan diye te baley ni Abimilik. Piru te in-ampuan e ni Abraham si Abimilik, imbawian e sikandin te Manama te dalu rin. Imbawian e degma te Manama ka asawa rin wey ka langun ne uripen din ne malitan eyew eg-anak e man-e sikandan.

Ka peglesut ni Isaak

21 Ne impanalanginan te Magbeyne ne Manama si Sara sumale te insaad din. <sup>2</sup> <sup>79</sup> Ne nataman, naberess e sikandin wey nakaanak te lukes minsan buyag e si Abraham. Inlesut ka bate te timpu iya ne insaad te Manama. <sup>3</sup> Ne ingngaranan ni Abraham ka anak din ki Isaak. <sup>4</sup>

<sup>80</sup> Te nawaluwan e ka bate, intulian e sikandin ni Abraham sumale te insuhu te Manama kandin. <sup>5</sup> Mahatus (100) e ka idad ni Abraham te neetew si Isaak. <sup>6</sup> Ne migkahi si Sara, "Nahala a wey impangisi a te Manama. Egpakangisi degma ka langun ne egpakarineneyitenged te neyitabu keddi. <sup>7</sup> Ware etew ne nakakahiki Abraham ne egpakapasusu e pad. Piru, nakaanak e pad te lukes minsan buyag e ka asawa ku."

8 Nataman, migtulin e ka bate. Te aldew ne eglutasen e ka bate, miggilutu te dakel si Abraham.

Ka pegdeldel ki Hagar wey ki Ismail

9 Sabeka ne aldew, miglimbayan ni Ismail ne anak ni Hagar ne matig-Ihiptu si Isaak ne anak ni Sara. <sup>10</sup>

<sup>81</sup> Te nakita seeye ni Sara, ingkahiyang din si Abraham, "Paawaa nu sika se malitan ne uripen duma te anak din. Kene egkaayun ne egpakuwa te karatuan nu ka anak te sika ne uripen su si Isaak de." <sup>11</sup> Nalange amana si Abraham su anak din ma degma si Ismail. <sup>12</sup> <sup>82</sup> Piru migkahiyan te Manama si Abraham, "Kene ka kalaggeweyitenged te bate wey te uripen nu ne si Hagar. Himuwa nu ka ingkahi

ni Sara su egligkat ki Isaak ka seeye se kabuhalan ne insaad ku keykew. <sup>13</sup> Egbehayan ku degma te masalig ne me anak ka anak te uripen wey egnenasud e sikandan su anak nu ma degma sikandin."

14 Te maselem-selem pad te seup ne aldew, imbehayan e ni Abraham si Hagar te egkeenen wey te weyig ne nakapenu te tahuunan ne laplap te mananap. Ne impatiang din e seini ki Hagar wey impeyipanew rin e duma te anak din. Ne miggipanew e ensi Hagar wey mgleug-leug e diye te disirtu ne enggaranan te Birsiba. <sup>15</sup> Te naamian e sikandan te weyig, in-engkeran din e ka bate diye te egdalungan te deisek ne kayu. <sup>16</sup> Miggendiyad sikandin te kewun-aan ne egkeumaan te egpane ka kariyu ligkat te bate. Ne diyad sikandin migpinnuu ka migsinehew wey migkahi diye te geyinawa rin, "Kena a egpakaaku ne egpipitew te anak ku ke egpatey."

17 Ne narineg te Manama ka pegrinehew te bate, wey in-umew si Hagar te panalihan te Manama ne egpuun te langit, "Hagar, nekey-a ka igkalaggew nu? Kene ka kaaldek su narineg te Manama ka pegrinehew te bate. <sup>18</sup> Hendiyei nud ka anak nu wey kitkita nu sikandin, su eggimuwen ku ne dakel ne nasud ka me kabuhalan din." <sup>19</sup> Nataman, due impakita te Manama ki Hagar ne belun. Miggendiyaan din seeye wey migsakug e sikandin wey inipenu din e ka tahuunan te weyig ne laplap te mananap wey impeinum

<sup>79</sup> + 21:2: Hib 11:11.

<sup>80</sup> + 21:4: Hin 17:12; Him 7:8.

<sup>81</sup> + 21:10: Gal 4:29-30.

<sup>82</sup> + 21:12: Rum 9:7; Hib 11:18.

din e ka bate. <sup>20</sup> Intantanuran te Manama ka bate taman te migdakel e sikandin. Mig-ugpe sikandin diye te disirtu ne egngaranan te Paran wey neyimu sikandin ne mannitingen. <sup>21</sup> Nataman, impaasawaan e sikandin te iney rin te matig-Ihiptu ne malitan.

Ka kasabutan ni Abimilik wey ni Abraham

<sup>22</sup> <sup>83</sup> Te seeye ne timpu, migparumeeey si Abimilik te pangulu te me sundalu rin ne si Pikul peendiye ki Abraham. Ne migkahiyani ni Abimilik si Abraham, “Imbulihan ka te Manama te langun ne eggimuwen nu. <sup>23</sup> Purisu saad ka pinaahi te ngaran te Manama ne kena a nikeykew eglimbungan wey ka me anak ku peendiye te langun ne kabuhalan ku. Ipakita nu ka keupiya nu keddi wey kayi te inged ne in-ugpaan nu, iling te keupiya ne impakita ku keykew.”

<sup>24</sup>Migkahi si Abraham, “Uya, igsaad ku.”

<sup>25</sup>Ne insumbung ni Abraham diye ki Abimilik ka meytenged te belun ne in-ahew te me suluhuanen din. <sup>26</sup> Migtak si Abimilik, “Wara a nakanengneng ke hentew ka miggimu kayi. Wara a nahud nikeykew kahii wey kunteen ku pad iya narineg seini.” <sup>27</sup> Ne migkuwa si Abraham te me karniru wey me baka wey imbehey rin seini ki Abimilik ne miggimu e sikandan te kasabutan. <sup>28</sup> Nataman, migkuwe e man-e si Abraham te pitu ne beyan ne natu te karniru puun te me ayam din wey impasuwey

rin e seini. <sup>29</sup> Ne mig-inse si Abimilik kandin, “Mania te insuwey nu sika se pitu ne natu te karniru?”

<sup>30</sup>Migtak si Abraham, “Kua nu sika eyew egpakamemalehet ka ne sikeddiey ka migkekali te seini ne belun.” <sup>31</sup> Sikan naa ka inggaranan te Birsiba <sup>84</sup> ka seeye ne inged su diye ma sikandan migpasaarey.

<sup>32</sup>Te napenge e ka inggimu ran ne kasabutan diye te Birsiba, mig-uli e si Abimilik wey si Pikul diye te inged te me Pilistihanen. <sup>33</sup> Ne migpamula si Abraham te kayu ne tamarisku diye te Birsiba, ne diye din e man-e simbaa ka Magbebeye, ka Manama ne Ware Egtamanan. <sup>34</sup> Ne naluhay pad ne mig-ugpe si Abraham diye te inged te me Pilistihanen.

Ka peg-eleg-eleg te Manama ki Abraham

<sup>22</sup> <sup>85</sup> Te pile e ne leg-un ka miglihad, mig-el-elehan te Manama si Abraham. In-umew rin sikandin, “Abraham!” Ne migtabak si Abraham, “Seini e red.”

<sup>2</sup> <sup>86</sup> Ne migkahi ka Manama, “Uyana nu si Isaak, ka sabsabeka ne anak nu ne indakelan nu te geyinawa, wey hendiye kew te inged ne Muriya. Ne ipanubad nu naa sikandin kayi te keddi isip egtutungen ne igpanubad ke diye kew e te bubungan ne igpanulu ku keykew.”

<sup>83</sup> + **21:22:** Hin 26:26.

<sup>84</sup> + **21:31** Te Hibruwanen: “belun te saad” ka kaluwasan te lalag ne “Birsiba.”

<sup>85</sup> + **22:1-13:** Hib 11:17-19.

<sup>86</sup> + **22:2:** 2Kru 3:1.

3Te napawe e, migselem-selem migpangayu si Abraham eyew igtemeg te egtutungen ne igpanubad. Indulan din seeye te asnu rin wey induma rin si Isaak wey ka daruwa ne uripen din, wey nangendiyad sikan dan te inged ne innangen te Manama kandin.<sup>4</sup> Te natatluwan e sikan dan ka miggipanew, nakite e ni Abraham ka inged ne egkilem pad.<sup>5</sup> Ne migkahiyen din ka me uripen, “Kayi kew re wey ka asnu. Sikanami re ki Isaak ka eggendiye eyew egsimba. Egkataman, egliped key red kayi.”

6Impatiang ni Abraham si Isaak te kayu ne igtemeg te igpanubad ne egtutungen, wey sikandin degma ka mig-uyan te ilab wey pupud. Ne migparumeey e sikandan se daruwa ka miggipanew.<sup>7</sup> Ne migkahi si Isaak, “Ame!”

N e migtabak si Abraham, “Nekey-a, Tatu?”

N e mig-inse si Isaak, “Duen e pupud ta wey kayu ne igtemeg, piru hendeid naa ka igpanubad ne nati te karniru ne egtutungen?”

8Ne migtabak si Abraham, “Ka Manama ka egbehey due, Tatu.” Ne migpabulus sikandan ka miggipanew.

9<sup>87</sup> Te nekeume e sikandan diye te inged ne innangen te Manama kandin, miggimu e si Abraham te altar ne eg-unturan te egtutungen wey diye din tapira te ampew ka me kayu

ne igtemeg. Ne imbaku din e ka anak din wey impeyibat din e diye te ampew te me kayu.<sup>10</sup> Ne ingkuwa rin e ka ilab eyew eggimatayan din e perem si Isaak.<sup>11</sup> Piru sauhune ne inumew sikandin te panalihan te Magbebabe ne Manama ne egsuun te langit, “Abraham, Abraham!”

N e migtabak sikandin, “Seini e red.”

12Ne migkahi ka panalihan te Manama, “Kene nu dereeti ka bate wey kene nu menuwa sikandin. Naknengneng e kuntee ka Manama ne egkaaldek ka iya kandin, su ware nu ma ikannuhun ka sabsabeka ne anak nu.”

13Ne migtenggak si Abraham wey due nakita rin ne lukesan ne karniru ne nakasanggat ka sungey diye te kayu ne deisek wey kenad egpakaawe. Ingkuwa rin seini ne iyan din e intutung liwan te anak din.<sup>14</sup> Sikan naa ka inggaranan ni Abraham ka seeye ne inged te, “Ka Magbebabe ne Manama ka Egbehey.” Minsan kuntee, egkahi red ka me etew, “Diye te bubungan te Magbebabe ne Manama, due igbehey rin.”

15Ne inumew e man-e si Abraham te panalihan te Magbebabe ne Manama puun te langit<sup>16</sup><sup>88</sup> wey migkahi, “Seini ka lalag te Magbebabe ne Manama, ‘Tenged te migtuman ka keddi wey ware nu ikannuhun ka sabsabeka ne anak nu, egsaad a wey egpahunlibetan ku seini<sup>17</sup><sup>89</sup> ne eg-

<sup>87</sup> + 22:9: San 2:21.

<sup>88</sup> + 22:16-17: Hib 6:13-14.

<sup>89</sup> + 22:17: Hib 11:12.

panalanginan ku iya sikeykew. Egpa-masuluhen ku ka me kabuhalan nu ne egpekeiling kasulug te me bituen diye te langit wey lelanek diye te ilis te dahan. Egpakareeg ka me kabuhalan nu te me kuntere dan.<sup>18</sup> <sup>90</sup> Igkarangeb, egpanalanginan te kabuhalan nu ka langun ne nasud kayi te ampew te tane. Igbehey ku keykew seini se langun su intuman nu ka insuhu ku keykew.’ ”<sup>19</sup> Nataman, miglibed e ensi Abraham diye te me uripen din, ne migparumeey e sikandan ka miguli diye te Birsiba, wey diyad e sikandan mig-ugpe.

Ka me kabuhalan ni Nahur

20Te ware naluhay, nahuhuran e si Abraham ne duen e me anak ni Milka, ka asawa te hari rin ne si Nahur.<sup>21</sup> Seini ka me anak dan ne lukes—si Us ka panganey, si Bus ka inggiba, wey si Kimuil ne amey ni Aram, ka ikatelu.<sup>22</sup> Ne duen pad man-e duma ne ensi Kasid, si Hasu, si Pildas, si Hidlap, wey si Bituil<sup>23</sup> ne amey ni Ribika. Sikandan se walu ka me anak enni Milka wey ni Nahur ne hari ni Abraham.<sup>24</sup> Due degma me anak ni Nahur te duwey rin ne egngaranan ki Riyuma. Sikandan ensi Tiba, si Gaham, si Tahas, wey si Maaka.

Ka pegpatey wey pegasbal ki Sara

23Migginguma te 127 ne leg-un ka idad ni Sara, ne henduen pad sikandin migpatey.<sup>2</sup> Ne diye sikandin migpatey te lungsud te Kiryat-Arba (wey ke Hibrun) ne diye te inged te Kanaan. Miglungku wey migpandalawit si Abraham te pegpatey ni Sara.

<sup>90+</sup> <sup>22:18:</sup> Him 3:25.

<sup>91+</sup> <sup>23:4:</sup> Hib 11:9,13; Him 7:16.

3Ne mig-awe pad sikandin diye te impaley-asan te asawa rin wey miggendiye te mahinged ne me Hitihanen wey migkahi,<sup>4</sup> <sup>91</sup> “Lapu e re ne mig-ugpe kayi te kaniyu. Purisu, belegyei a ubag nikaniyu te tane eyew eglebengen ku te asawa ku.”

5Ne migtabak sikandan,<sup>6</sup> “Ahalen, pammeha key nikeykew. In-ila ney sikeykew ne mabantug ne pangulu kayi te kanami, purisu, diye nu ilebeng ka asawa nu te subla ne me-upiya ne lebenganan ney kayi. Ware sabeka kanami ne eg-apul te pegbehey keykew te lebenganan eyew ig-pakalebeng nu ka asawa nu.”

7Ne mig-unduk si Abraham diye te tangkaan te me Hitihanen te pegpasalamat kandan.<sup>8</sup> Ne migkahi sikandin, “Ke eg-uyun kew ne kayi ku igsabal ka asawa ku, hanguya niyu ubag si Iprun ka Hitihanen ne anak ni Suhar,<sup>9</sup> ne igbelegye kedi ka sulung ne diye te ilis te kamet din diye te Makpila. Kahii niyu sikandin te eg-bayaran ku seeye te eleg ne kentiddad kayi te tangkaan niyu eyew keddiey e sika se egkasabalan.”

10Ne diye bes degma migpinuu si Iprun te miglibulungan dan ne marani te gumawan te siyudad duma te me Hitihanen. Purisu, intabak din si Abraham wey nakarineg ka langun ne diye te gumawan te siyudad.<sup>11</sup> Kahi rin, “Ahalen, pammeha a nikeykew, kene nud bayari ka kamet su igbehey ku re seini keykew wey iglagkes kud iya ka sulung ne diye te ilis kayi. Kayi te tangkaan te duma ku ne me Hit-

hanen, igbehey ku seini keykew eyew egkasabalan nu te asawa nu.”

12Piru miglangkeb e man-e si Abraham diye te tangkaan te me Hitihanen,<sup>13</sup> wey ingkahiyan din si Iprun ne narindeg te langun, “Pammineg ka, egbayaran ku iya ke pila ka kentiddad te kamet. Dawata nu ka ighbayad ku eyew diye ku iga kasabal ka asawa ku.”

14Ne migtabak si Iprun,<sup>15</sup> “Ahalen, hep-at ne gatus (400) ne pelata ne mahal ka kentiddad te sika ne tane, piru nekegmenu naan de iya sika. Isabal nud e ka asawa nu.”<sup>16</sup> Nabennalan e si Abraham te kentiddad ne ingkahi ni Iprun. Sikan naa ka mititimbang e sikandin te hep-at ne gatus (400) ne pelata ne mahal, sumale te timbangan ne inggamit te me nigosyanti. Ne imbayad din seeye ki Iprun diye te tangkaan te me Hitihanen.

17Seeye naa ka nakuwe e ni Abraham ka tane ni Iprun diye te Makpila ne diye dapit te igsile ligkat te Mamri. Lagkes e ka sulung wey ka langun ne me kayu ne diye te kamet.<sup>18</sup> Ne nanengnengan te langun ne me Hitihanen ne nasapen diye, ne si Abraham e ka kamuney dutu.<sup>19</sup> Ne insabal ni Abraham si Sara diye te sulung ne diye te kamet ne diye te Makpila. Ka Makpila sakup te Kanaan, wey marani seini te Mamri ne iyan ded ka Hibrum.<sup>20</sup> Sikan naa ka nakuwa ni Abraham ka kamet te me Hitihanen, lagkes ka sulung ne inggimu rin e ne sabalanan.

Ka peg-asawa ni Isaak

24Te seeye ne timpu, buyag e ne subla si Abraham wey impanalanginan sikandin te Magbebaye ne Manama te langun ne inggimu rin.<sup>2-3</sup>

Migkahiyan din ka igbuyag te me suluhuanen din ne impiyalan din te langun ne karatuan din, “Ipataliware nu ka belad nu te daruwa ne bubun ku wey saad ka keddi pinaahi te ngaran te Magbebaye ne Manama, ka Manama te langit wey tane, ne kene ka egpamitew te mahinged kayi te Kanaan eyew igpaasawa te anak ku ne si Isaak.

<sup>4</sup> Ke kene, hendiye ka te inged ne miglikatan ku wey diye nu pamitawi te igpaasawa ka anak ku te me karumaan ku.”

5Piru mig-inse ka suluhuanen, “Ke kene egduma keddi kayi ka malitan, egpeendiyeen ku naa ka anak nu te inged ne miglikatan nu?”

6Ne migtabak si Abraham, “Kene nud en iya ipeendiye ka anak ku!<sup>7</sup> Su ka Magbebaye ne Manama ne diye te langit, ka mig-uyan keddi kayi ligkat te baley te amey ku wey ligkat te inged ne neetawan ku. Migsaad sikandin keddi ne igbehey rin seini se tane diye te me kabuhalan ku. Egsuhu sikandin te panalihan din ne egguna-a keykew eyew diye ka egpakuwa te malitan ne igpaasawa ki Isaak.<sup>8</sup> Piru ke egkeepes ka malitan ne egduma keykew, warad labet nu te impasaad ku keykew. Piru minsan nekey ka egkatamanan, kene nu ipeendiye ka anak ku.”<sup>9</sup> Sikan naa ka impataliware te suluhuanen ka belad din diye te daruwa ne bubun ni Abraham ne ahalen din, wey migsaad sikandin ne egtumanen din ka insuhu ni Abraham kandin.

10Ne migkuwa ka suluhuanen te sapulu ne kamil te ahalen din wey mig-uyan man-e sikandin te masalig ne mahal ne igdasag, ne miggendiyad e sikandin te siyudad ni Nahur ne diye te inged te Misuputamya. <sup>11</sup> Te nekeume e sikandin, impalangkeb din ka me kamil marani te belun diye te liyawangan te siyudad. Egkasagkup e seeye wey egmanakeru e ka me malitan. <sup>12</sup> Ne mig-ampu sikandin, “Magbebeye, Manama te ahalen ku ne si Abraham, bulihi a nikeykew te egpamitew te igpaasawa ki Isaak wey ipapitew nu ka geyinawa nu ne kene egkabalbalawan ki Abraham ne ahalen ku. <sup>13</sup> Seini a te lenged te belun wey eggendini ka me mengebay puun te siyudad eyew egpanakeru. <sup>14</sup> Ke egkahi a diye te sabeka ne mengebay, ‘Isabuk nu pa ka banga nu wey peinume e pa nikeykew.’ Ke egtabak perem sikandin, ‘Ne, inum kad iya wey egpeinumen ku degma ka me kamil nu,’ sikandin naa ka in-alam nu ne egkaasawa ni Isaak. Ke egkatuman seini, egkanengnengan ku ne impapitew nu iya ka geyinawa nu ne kene egkabalbalawan diye te ahalen ku.”

15Te ware pad nekeimpus sikandin ka mig-ampu, due miglepew ne egngaranan ki Ribika ne migtiang te banga. Anak sikandin ni Bituil ne anak enni Milka wey Nahur ne hari ni Abraham. <sup>16</sup> Mengebay pad sikandin wey mateles amana. Migtupang sikandin diye te belun wey inipenu din te weyig ka banga din. Ne migtakereg e sikandin. <sup>17</sup> Ne migpalahuy ka suluhuanen ne migsinug-ung kandin ne migkahi, “Peinuma a ubag te weyig nu.”

18Ne migtabak sikandin, “Uya ahalen, inum ka.” Indagdahew rin isabuk ka banga din wey impatalitung din e ka suluhuanen. <sup>19</sup> Te nekeimpus e sikandin ka mig-inum, migkahi si Ribika, “Egsakug a degma te weyig para te me kamil nu wey igpeinum ku kandan taman te egkabalung sikandan.” <sup>20</sup> Te sikan de, indagdahew rin e iitis ka weyig diye te egpeinumanan te me ayam. Ne miglibed-libed sikandin ka egsakug diye te belun taman te nenekeinum e langun ka me kamil. <sup>21</sup> Mig-iipat ka suluhuanen kandin ke malehet ne sikandin ka in-alam te Magbebeye ne Manama eyew egkaasawa ni Isaak.

22Te nekeinum e ka me kamil, migkuwa ka suluhuanen te sabeka ne mahal ne sising ne bulawan wey imbitin din diye te irung ni Ribika. Migkuwa pad man-e sikandin te daruwa ne dakel ne beday ne bulawan wey insaluub din te me belad ni Ribika. <sup>23</sup> Ne mig-insaan din si Ribika, “Hentew-a ka amey nu? Duen ded egkeyirehaan diye te baley niyu?”

24Ne migtabak sikandin, “Si Bituil ka amey ku, ne anak enni Nahur wey ni Milka.” <sup>25</sup> Due eggirehaan niyu diye te baley ney wey due degma dakel ne lahami wey kumpay ne igsunggud te kamil niyu.”

26Ne mig-usengul diye te tane ka suluhuanen wey insimba rin ka Magbebeye ne Manama, <sup>27</sup> wey miggenendue, “Egsayeen ka Magbebeye ne Manama, ka Manama te ahalen ku ne si Abraham, ne migpabulus se geyinawa ne kene egkabalbalawan wey matinumanen kandin. In-

uyan a nikandin kayi te anaken wey apu te ahalen ku.”

28Ne mig-uli e ne migpallahuy ka mengebay wey migpangguhuran din e ka iney rin wey ka langun ne diye te baley. <sup>29</sup> Due maama ni Ribika ne egngaranan ki Laban. Migpallahuy sikandin peendiye te suluhuanen ni Abraham ne diye te lenged te belun. <sup>30</sup> Su nakita rin ka sis-ing wey ka beday diye te me belad ni Ribika, wey narindeg din ka pangguhuren ni Ribika meytenged te innangen te etew kandin. Sikan naa ka miggendiye sikandin te suluhuanen ni Abraham ne migsasindeg diye lenged te me kamil rin ne marani te belun. <sup>31</sup> Migkahi si Laban, “Ew, sikeykew bes ka impanalanginan te Magbebaye ne Manama. Mania te kayi ke re egesasindeg? Leus kad diye te baley, su intahahaan kud sikeykew te sinabeng diye te kanami, wey due egkatahuan te me kamil nu.”

32Sikan naa ka migleus e ka suluhuanen diye te baley. Pegkeumaran, insabuk e ni Laban ka dulan te me kamil wey insungguran din e seini te lahami wey kumpay. In-uyanan din degma te weyig ka suluhuanen ni Abraham wey ka me duma rin eyew egpakapanlu-lu sikandan te me paa ran. <sup>33</sup> Te migsendaran e ka suluhuanen te egkeenen, migkahi sikandin, “Kene e pad egkeen ke kene ku pad igpakapangguhud ka hipanawen ku.”

N e migkahi si Laban, “Na, ipang-guhud nud e.”

34Migkahi sikandin, “Suluhuanen a ni Abraham. <sup>35</sup> Impanalanginan amana te Magbebaye ne Manama

ka ahalen ku wey neyimu sikandin ne mabantug. Impamehayan din te masalig ne karniru, me kambing, me baka, me seleppi, me bulawan, me uripen ne lukes wey malitan, me kamil wey me asnu. <sup>36</sup> Te buyag e si Sara ne asawa te ahalen ku, nakaanak sikandin te lukes. Ne imbehayan sikandin te ahalen ku te langun ne karatuan din. <sup>37</sup> Ne impasaad a te ahalen ku ne egtumanen ku ka insuhu din ne kene egpaasawaan ka anak din te mengebay diye te Kanaan, ka inged ne mig-ugpaan ney kuntee. <sup>38</sup> Piru impeengkayi a mule nikandin te ugpaan te amey rin, wey kayi a te me karumaan din pepamitawa te igpaasawa te anak din. <sup>39</sup> Ne miginsaan ku ka ahalen ku ke nekey ka eggimuwen ku ke kene egduma keddi ka malitan? <sup>40</sup> Migtabak sikandin, ‘Ka Magbebaye ne Manama ne intuman ku layun ka egsuhu te panalihan din ne egduma keykew eyew egkatuman ka hipanew nu. Sikan naa ka egpakkita ka te igpaasawa te anak ku diye te karumaan ku, wey diye te kabuhalan te amey ku. <sup>41</sup> Wey ke re egpakaawe te impasaad ku keykew ke eggendiye ka te me karumaan ku. Ne minsan eg-apul sikandan ne egdumeen nu ka malitan, egpakaawe ke red iya man-e te impasaad ku keykew.’

42“Na, te nekeuma ad e diye te belun ganna, mig-ampu a, ‘Magbebaye ne Manama, ka Manama te ahalen ku ne si Abraham, bulihi a ubag nikeykew ne egkatuman ka hipanew ku. <sup>43</sup> Kayi e re egesasindeg te marani te belun kuntee. Meyi due egpanakeru ne mengebay kayi, egbuyuan ku sikandin te weyig puun te banga din. <sup>44</sup> Ke egpeinu-

men a nikandin lagkes ka me kamil ku, ne sikandin naan e ka in-alam nu ne igpaasawa te anak te ahalen ku.’<sup>45</sup> Na, te ware e pad nekeimpus te inggeyinawa ku re ne peg-ampu, miggungume e si Ribika ka migtiang te banga. Migtupang sikandin diye te belun eyew egssakug. Ingkahiyen ku sikandin, ‘Peinuma a ubag nikeykew.’<sup>46</sup> Indagdahew rin isabuk ka banga ne intiang din wey migkahi sikandin, ‘Uya, inum kad e wey egpeinumen ku degma ka me kamil nu.’ Sikan naa ka mig-inum a wey impeinum din e ka me kamil.<sup>47</sup> Ne mig-insaan ku sikandin, ‘Hentew-a ka amey nu?’ Migtabak sikandin, ‘Si Bituil ka amey ku ne anak enni Nahur wey ni Milka.’ Te sikan de, imbitinan kud te sising ka irung din wey insaluuban kud te beday ka me belad din.<sup>48</sup> Ne mig-usengul a diye te tane wey insimba ku ka Magbebabe ne Manama. Insaye ku ka Magbebabe, ka Manama te ahalen ku ne si Abraham, ka Manama ne migpanulu keddi ke hendei ku nakita ka mengebay ne anak te karumaan te ahalen ku ne egkaasawa te anak din.<sup>49</sup> Kuntee, nangeni a nikaniyu ke malehet ka keupiya niyu te ahalen ku. Ke kene, nangeni a nikaniyu eyew egpaketuman-suman a ke nekey ka eggimuwen ku.”

50Ne migtabak ensi Laban wey si Bituil, “Tenged su ligkat ma seini te Magbebabe ne Manama, warad igpakalalag ney.<sup>51</sup> Seini red si Ribika. Dumaa nud sikandin te peguli niyu. Ipaasawa nud sikandin te anak te ahalen nu, sumale te ingkahi te Magbebabe ne Manama.”<sup>52</sup> Te pegkarineg dutu te suluhuanen ni Abraham, mig-usengul rin e diye te tane wey insimba rin ka Magbebabe

ne Manama. <sup>53</sup> Ne impamuken din e ka inuyanan din ne me balieg ne buawan, me sising, me eritis, wey mateles ne me manggad wey imbehey rin e seini ki Ribika. Ne impamehayan din e degma te mahal ne me dasag ka maama rin wey ka iney rin.

54Nataman, miglabung e ka suluhuanen ni Abraham wey ka me duma rin wey diyad e sikandan miggirehe. Te peg-enew ran e te maselem, migkahi e ka suluhuanen ni Abraham, “Eg-uli ad e diye te ahalen ku.”

55Piru migkahi ka iney wey maama ni Ribika, “Peugpaa nu pa si Ribika kayi minsan sapulu de ne aldew, egkataman, kaayun e ne egkeyipanew kew.”

56Piru migkahi ka suluhuanen ni Abraham, “Kena ad e hawiri nikaniyu su impanalanganan te Magbebabe ne Manama ka hipanew ku. Peulia ad nikaniyu diye te ahalen ku.”

57Migtabak sikandan, “Egumawen te pad ka mengebay wey eg-insaan ta sikandin.”<sup>58</sup> Sikan naa ka in-umew ran e si Ribika wey mig-insaan dan, “Egkeupian ke naa ne egdume e te seini ne etew?”

M igtabak sikandin, “Uya.”

59Sikan naa ka imparuma ran e si Ribika wey ka talagtanggu kandin te suluhuanen ni Abraham wey te me duma rin.<sup>60</sup> Ne impanalanganan dan si Ribika te migkahi,

“ Peyi,

- e gkeyimu ka ne iney  
 t e subla ne masalig ne kabuhalan.  
 E gkatalu te me kabuhalan nu  
 k a me kuntere dan.”<sup>61</sup> Te naandam e ka langun, mig-untud e si Ribika wey ka me suluhuanen din ne malitan te me kamil. Ne migluyud e sikandan te suluhuanen ni Abraham.

62Ne si Isaak degma, diye sikandin mig-ugpe te Nigib wey sikan pad iya miggunguma puun te Biirlahayrui. <sup>63</sup> Te sabeka ne aldew te egkasagkup e, mgleug-leug sikandin diye te kamet wey due nakita rin ne me kamil ne diye epabulus te kandin. <sup>64</sup> Te nakita ni Ribika si Isaak, miglegsad e sikandin te kamil <sup>65</sup> ne mig-inse te suluhuanen ni Abraham, “Hentew-a ka seeye te kamet ne egsinug-ung kanta?”

M igtabak ka suluhuanen, “Sikandin ka ahalen ku.” Te sikan de, ingkuwe e ni Ribika ka bunbun te ulaula wey imbunbunan din e ka ulaula rin.

66Ne migpangguhuran te suluhuanen si Isaak meyitenged te langun ne inggimu rin. <sup>67</sup> Nata-man, in-uyan e ni Isaak si Ribika diye te balungbalung ne in-ugpaan te iney rin dengan, wey in-asawa rin e sikandin. Ne indakelan din te geyinawa si Ribika. Ne dutu, warad sikandin miglungku tenged te peg-patey te iney rin.

Ka duma ne me kabuhalan ni Abraham

(1 Kru. 1:32-33)

<sup>92</sup> + 25:10: Hin 23:3-16.

25Ne mig-asawe e man-e si Abraham te senge-malitanan ne migngaranan ki Kitura. <sup>2</sup> Nakaanak sikandin ki Simran, si Huksan, si Midan, si Midyan, si Isbak, wey si Sua. <sup>3</sup> Si Huksan ka amey ni Siyiba wey ni Didan, wey si Didan ka miglirkatan te me tribu ne egngaranan te Asurimanen, Litusimanen, wey Liyumimanen. <sup>4</sup> Due degma me anak ni Midyan ne egngaranan ki Ipa, si Ipir, si Hanuk, si Abida, wey si Ildaa. Sikandan langun ka me kabuhalan ni Kitura ne asawa ni Abraham.

5Ne imbehey ni Abraham ki Isaak ka langun ne karatuan din <sup>6</sup> te ware pad sikandin migpatey. Piru impamehayan din degma te dasag ka me anak te me duwet rin, wey impeendiye din e sikandan te igsile eyew epakariyu-diyu te anak din ne si Isaak.

Ka pegpatey wey ka pegasbal ki Abraham

7Miggunguma te 175 ne leg-un ka idad ni Abraham, wey te seeyad e ka kabuyahi rin <sup>8</sup> migpatey e sikandin ne meupiya se peg-ugpe, wey miglelung e ka gimukud din te gimukud te me apu din ne migpatey e. <sup>9</sup> Insabal e sikandin enni Isaak wey ni Ismail diye te sulung te Makpila ne diye te igsile ligkat te Mamri. Seeye ka sulung ne diye te kamet ni Iprun ne anak ni Suhar ne Hitihanen <sup>10</sup> <sup>92</sup> ne imbeli ni Abraham diye te me Hitihanen. Ne diye degma isabal si Sara dengan. <sup>11</sup> Te namatey e si Abraham, impanalanganin te Manama si Isaak ne anak din ne diye mig-ugpe te marani te belun ne Biirlahayrui.

Ka me kabuhalan ni Ismail

(1 Kru. 1:28-31)

12Ne seini ka me kabuhalan ni Ismail, ka anak ni Abraham ki Hagar ne matig-Ihiptu ne uripen ni Sara.<sup>13</sup> Seini ka ngaran te me lukes ne anak ni Ismail ligkat te panganey peendiye te igkalitan—si Nibayut, si Kidar, si Adabil, si Mibsam,<sup>14</sup> si Misma, si Duma, si Masa,<sup>15</sup> si Hadad, si Tima, si Hitur, si Napis, wey si Kidima.<sup>16</sup> Sikan-dan langun ka me lukes ne anak ni Ismail. Neyimu sikandan ne me pangulu te sapulu wey daruwa (12) ne tribu ne nangugpe diye te nalein-lein ne me inged dan. Te ware naluhey, migngaranan ka me tribu ran sumale te ngaran te me pangulu ran.<sup>17</sup> (Ne migpatey si Ismail te 137 ka idad din, wey miglemung e degma ka gimukud din te gimukud te me kaap-apuan din ne migpatey e.)<sup>18</sup> Nangugpe ka me kabuhalan din ligkat te inged te Habila peendiye te Sur, ne diye te igsile te Ihiptu ne egpeendiye te Asirya. Ne ingkuntere dan ka langun ne karu-maan dan ne kabuhalan ni Isaak.

Ka pegkeetew ni Isaw wey ni Hakub

19Seini ka pangguhuren meyitenged te me anak ni Isaak, ne anak ni Abraham.<sup>20</sup> Hep-at ne pulu (40) ka idad ni Isaak te naka-sawa sikandin ki Ribika, ne anak ni Bituil wey atebey ni Laban. Matig-Aramiya ensi Bituil wey Laban wey diye sikandan mig-ugpe te Padanaram.<sup>21</sup> Tenged te kene egpakaanak si Ribika, mig-ampu si Isaak te Mag-bebaye ne Manama eyew egpakaanak sikandin. Ne intabak te Manama ka

peg-ampu din, sikan naa ka naber es si Ribika.<sup>22</sup> Migsesepingan sikandin piru te ware pad miglesut ka me bate, migpakeiysey ran e diye te getek din. Migkahi si Ribika, “Mania te egkeyitabu seini keddi?” Sikan naa ka mig-insaan din ka Magbebeye ne Manama meyitenged dutu.<sup>23</sup><sup>93</sup> Ne migkahiyan sikandin te Magbebeye ne Manama,

“ Daruwa ne nasud

k a due te getek nu.

E g-anak ka te daruwa

n e egpekegkuntere.

E gkeyimu ne manekal ka sabeka

t e duma rin,

w ey egkeyimu ne suluhuanen ka kakey

t e hari rin.”

24Te miggumbe e ka aldew ne eglesutan e si Ribika, migsesepingan iya sikandin.<sup>25</sup> Ka an-anayan ne miglesut malalab wey bulbulen, sikan naa ka ingngaranan sikandin ki Isaw.<sup>94</sup><sup>26</sup> Te ware pad miglesut ka sepping, miggen-genan din ka palu ni Isaw, sikan naa ka migngaranan sikandin ki Hakub.<sup>95</sup> Ne hen-em ne pulu (60) ka idad ni Isaak te miglesut sikandan.

Ka pegbeleye ni Isaw te katenged din isip panganey

<sup>93 + 25:23:</sup> Rum 9:12.

<sup>94 + 25:25</sup> Te Hibruwanen: “bulbulen” ka kaluwasan te lalag ne “Isaw.”

<sup>95 + 25:26</sup> Te Hibruwanen: “inggen-genan din ka palu” ka kaluwasan te lalag dan ne “Hakub.”

27Te migtulin e ka me bate, neyimu ne meinges ne mannitingen si Isaw. Egkeupian sikandin ne egleug-leug diye te me kamet, pиру si Hakub, maleman mule wey diye de eg-ugpe te baley. <sup>28</sup> Pinalangge ni Isaak si Isaw su egkeupian sikandin ne egkeen te keingesan din, pиру pinalangge degma ni Ribika si Hakub.

29Sabeka ne aldew, mig-uli si Isaw ka migpanitingen ne eggutasan e amana, wey nakasalengan sikandin te migsusuba si Hakub te malalab ne bengag ne insabawan. <sup>30</sup> Migkahiyan din si Hakub, “Pakeena a nikeykew te sika se malalab ne insabawan nu su eggutasan ad amana.” (Purisu in-imuan si Isaw ki Idum. <sup>96</sup>)

31Piru migtabak si Hakub, “Wey ku re epakeena sikeykew ke igbehey nu keddi ka katenged nu isip panganey.”

32Ne migkahi si Isaw, “Uya, igbehey ku! Nekey ka karuan te katenged ku isip panganey ke egkapatay a te gutas kuntee?”

33 <sup>97</sup> Migtabak si Hakub, “Pahunlibet ke pa ne igbehey nu keddi ka katenged nu.”

**S**ikan naa ka nakapahunlibet si Isaw ne igbehey rin e diye ki Hakub ka katenged din isip panganey. <sup>34</sup> Ne imbehayan e sikandin ni Hakub te paan wey te insabawan din ne bengag.

Te nakakeen wey nekeinum e si Isaw, miggipanew e sikandin. Iling due ka pegbalahad ni Isaw te katenged din isip panganey.

Ka peggalin ni Isaak diye te Girara

26Te seeye ne timpu, due bitil te seeye ne inged, iling te neyitabu te timpu pad ni Abraham. Sikan naa ka miggendiye si Isaak te Girara ne mig-ugpaan ni Abimilik ne Hari te me Pilistihanen. <sup>2</sup> Ne migpakita ka Magbebeye ne Manama ki Isaak wey migkahi, “Kene ka hendiye te Ihiptu. Palunggehaat ka te inged ne egpeug-paan ku keykew. <sup>3</sup> <sup>98</sup> Kayi ke pa ugpe su egdumaan wey epanalanganan ku sikeykew. Igbehey ku keykew wey te me kabuhalan nu ka seini ne tane ne insaad ku te amey nu ne si Abraham. <sup>4</sup> Egpamasuluhen ku ka me kabuhalan nu ne iling kasulug te me bituen diye te langit, wey igbehey ku kandan seini se intiru ne inged. Pinaahi te kabuhalan nu, epanalanganan ku ka langun ne nasud kayi te ampew te tane, <sup>5</sup> su migtuman si Abraham te me balaud ku wey te langun ne insuhu ku kandin.”

6Purisu, diye mig-ugpe si Isaak te Girara. <sup>7</sup> <sup>99</sup> Te mig-insaan sikandin te me lukes ne mahinged te seeye ne inged meyitenged te asawa rin, ware sikandin migpang-guhud te malehet su naaldek sikandin. Migkahi sikandin te atebey rin si Ribika su nekeisip sikandin ne kema ke eggimatayan din eyew eg-ahawen ka asawa rin, su mateles sikandin ne malitan. <sup>8</sup> Ne mig-ugpe si Isaak diye

<sup>96</sup> + 25:30 Te Hibruwanen: “malalab” ka kaluwasan te lalag ne “Idum.”

<sup>97</sup> + 25:33: Hib 12:16.

<sup>98</sup> + 26:3-4: Hin 22:16-18.

<sup>99</sup> + 26:7: Hin 12:13; 20:2.

te bayew e naluhey ne timpu. Due sabeka ne aldew ne migpamintana si Abimilik ne Hari te me Pilistihanen, wey nakita rin ne migpaleglehengey si Isaak wey si Ribika.<sup>9</sup> Purisu, impeumew rin si Isaak wey migkahiyan, “Asawa nu bes sikandin! Mania te migkahi ka ne atebey nu sikandin?”

N e migtabak si Isaak, “Uya su naaldek a ne eggimatayan a nikaniyu eyew eg-ahawen niyu sikandin.”

10Migkahi si Abimilik, “Mania te neyimu nu seini kayi te kanami? Etuwey ke migguliran sikandin te sakup ku, nakasale key e perem ligkat ded keykew.”<sup>11</sup> Nataman, impanpanayan ni Abimilik ka langun ne etew ne migkahi, “Minsan hentew ne egdereet te seini ne lukes wey te asawa rin, eggimatayan sikandin.”

12Ne migpamula si Isaak te seeye ne inged wey mahatus (100) ne lupi ka naahaani rin te seeye ne leg-un, su impanalanganan sikandin te Magbebaya ne Manama.<sup>13</sup> Naratu sikandin wey natimtimulan pad ka karatuan din taman te suble e sikandin ne meyaman.<sup>14</sup> Migmasalig e ka me karnirurin, me kambing, me baka, wey me uripen din. Tenged due, nasekel ka me Pilistihanen ki Isaak,<sup>15</sup> wey imbunbunan dan te tane ka me belun ne ingkali re dengan te me uripen te amey rin ne si Abraham.

16Ne ingkahiyan ni Abimilik si Isaak, “Awe kew e kayi su madmaren sen kew e kanami.”<sup>17</sup> Sikan naa ka

mig-awe e si Isaak diye wey diyad e mig-ugpe te Napu te Girara.<sup>18</sup> Due degma me belun diye ne impakaliyan te amey rin dengan ne imbunbunan e te me Pilistihanen. Ne impakaliyan din ded man-e seeye wey impeiling din ded ka me ngaran te me belun te ingngaran dengan te amey rin.

19Te nangekali e ka me suluhuanen ni Isaak diye te napu, nakakita sikandan te sebseb.<sup>20</sup> Piru in-ehetan sikandan te me talagtameng ne me matig-Girara wey migkahiyan te kandan kun ka seeye ne weyig. Purisu, migngaranan ni Isaak ka belun te Isik<sup>100</sup> su in-ehetan sikandin te me matig-Girara.

21Ne migkekali e man-e ka me suluhuanen ni Isaak te lein ne belun. Piru migpaap-apuley red man-e sikan-dan meyitenged te belun. Purisu, migngaranan ni Isaak ka belun te Sitna.<sup>101</sup><sup>22</sup> Ne miggalin e man-e ensi Isaak wey migpakekali e man-e sikandan te lein ne belun. Nataman, warad sikandan eheti te me mahinged meyitenged te seeye ne belun. Purisu, migngaranan ni Isaak ka belun te Rihubut<sup>102</sup> su migkahi sikandin, “Kuntee, imbehayan kid e te kaligwangan te Magbebaya ne Manama ne eg-ugpe te seini ne inged, wey meupiye e ka peg-ugpe ta kayi.”

23Ne miggalin e man-e ensi Isaak diye te Birsiba.<sup>24</sup> Te pegginguma rin diye te seeye ne karusileman, migpakita ka Magbebaya ne Manama kandin ne migkahi,

<sup>100</sup> + 26:20 Te Hibruwanen: “pegpaap-apuley” ka kaluwasan te lalag ne “Isik.”

<sup>101</sup> + 26:21 Te Hibruwanen: “pegkasilag” ka kaluwasan te lalag ne “Sitna.”

<sup>102</sup> + 26:22 Te Hibruwanen: “kaligwangan” ka kaluwasan te lalag ne “Rihubut.”

“ Sikeddi ka Manama te amey nu ne si Abraham.

K ene ka kaaldek su egdumaan ku sikeykew.

E gpanalanginan ku sikeykew wey egyptamuluhan ku ka

**m** e kabuhalan nu

t enged te suluhuanen ku ne si Abraham.”<sup>25</sup> Nataman, miggimu si Isaak te altar ne eg-unturan te egtutungen wey diye din e man-e sayaa ka Magbebeye ne Manama. Ne migpasasindeg sikandin te balungbalung diye wey impakekali rin e man-e ka me suluhuanen din te belun.

Ka pegpasabutey enni Isaak wey Abimilik

26<sup>103</sup> Sabeka ne aldew, miggendiye ki Isaak si Hari Abimilik puun te Girara ne migparumeeey ki Ahusa ne talagtambag kandin te wey ki Pikul ne pangulu te me sundalu rin.<sup>27</sup> Ne mig-inse si Isaak kandan, “Mania te miggendini kew keddi kuntee te egdumut kew ma keddiey wey indeldel e pad man-e nikaniyu?”

28Migtabak sikandan, “Napamalehetan ney e kuntee ne egdumaan ka te Magbebeye ne Manama. Sikan naa ka nakasuman-suman key ne eggimu te kasabutan kayi te keykew. Egkeupian key ne eggsaad ka<sup>29</sup> ne kene key nikeykew egdereetan, su ware ney ma degma sikeykew dereeti. Layun ne meupiya ka inggimu ney keykew wey meupiya ka

peg-awe nu. Ne kuntee, impanalangan kad te Magbebeye ne Manama!”

<sup>30</sup> Seeye naa ka miggilutuan sikandan ni Isaak te dakel, ne nangeeken e wey nangiinum e sikandan. <sup>31</sup> Te seup ne aldew, te maselem-selem pad, migpeyimuwey e sikandan te kasabutan. Nataman, impaligkat e sikandan ni Isaak ne meupiye e se me geyinawa.

32Te sikan de iya ne aldew, miggingga ka me suluhuanen ni Isaak eyew egkahi kandin te due weyig te belun ne ingkaliyan dan.<sup>33</sup> Ne migngaranan ni Isaak ka belun te Siba.<sup>104</sup> Purisu, inggaranan ded te Birsiba ka seeye ne inged taman kuntee.

Ka peg-asawa ni Isaw te daruwa ne Hitihanen

34Te hep-at e ne pulu (40) ka idad ni Isaw, nakaasawa sikandin te daruwa ne Hitihanen, si Hudita ne anak ni Biiri wey si Basimat ne anak ni Ilun.<sup>35</sup> Piru mahirap ka peg-ugpe enni Isaak wey ni Ribika tenged te me asawa ni Isaw.

Ka pegpanalangin ni Isaak ki Hakub

27Ne nabuyag e si Isaak wey kennad e egyptamuluhanen te lalag ne “Siba.”

<sup>103</sup> + 26:26: Hin 21:22.

<sup>104</sup> + 26:33 Te Hibruwanen: “saad” ka kaluwasan te lalag ne “Siba.”

2Ne migkahi si Isaak, “Kuntee, buyag ad e wey te kene egkaluhay, egpatey ad. <sup>3</sup> Kua nu ka panganiban nu, ka piet wey me busug. Hendiye ka te mabbenes wey panitingeni e pa. <sup>4</sup> Pegkapenga ne hilutui ad te mananam ne sere ne igkatelesi ku te egkeen, wey uyana nu kayi su egkeen a. Egkataman, egpanalanginan ku sikeykew te kene e pad egpatey.”

5Piru migpammineg bes si Ribika te peglalag ni Isaak ki Isaw. Sikan naa, te nekeyipanew e si Isaw ka egpanitingen, <sup>6</sup> migkahiyan ni Ribika ka anak din ne si Hakub, “Nakarineg a te amey nu ne migkahiyan din ka kakey nu ne si Isaw <sup>7</sup> te egpepanitingen wey egpeyilutuen sikandin te mananam ne sere su egkeenen din. Egkataman, egpanalanginan din e si Isaw diye te tangkaan te Magbebaye ne Manama te kene pad sikandin egpatey. <sup>8</sup> Purisu, Tatu, tumana nu ka igsuhu ku keykew. <sup>9</sup> Hendiye ka te me kambing wey angye ka te daruwa ne mallambeg ne nati su eggilutuan ku ka amey nu te mananam ne keenen ne igkatelesi rin te egkeen. <sup>10</sup> Egkataman, uyana nu seini diye te amey nu. Ke egkakeen din e seini, egkapanalanginan kad nikandin te kene din pad egpatey.”

11Piru migtabak si Hakub te iney rin, “Bulbulen si Isaw piru malurung a mule. <sup>12</sup> Kema ke egsamsamen a ni Ame ne egkanengnengan din ne eg-akalan ku sikandin, wey egdilusen ad nasi nikandin.”

13Ne migkahi ka iney rin, “Tatu, sikeddi ka egparilus ke egdilusen ka nikandin, tumana nu re iya ka inlalag ku. Na, hipanew kad wey angye kad

te kambing.” <sup>14</sup> Sikan naa ka migangey e si Hakub te daruwa ne kambing wey miggilutu e ka iney rin te mananam ne pegkeen ne igkatelesi te amey rin te egkeen. <sup>15</sup> Ne ingkuwa ni Ribika ka subla ne mateles ne kumbale ni Isaw ne intines diye te baley wey impasaluub din e ki Hakub. <sup>16</sup> Imbukusan din te laplap te kambing ka me belad ni Hakub wey ka lieg din ne malurung. <sup>17</sup> Ne imbehey rin e ki Hakub ka mananam ne pegkeen wey paan ne inggilutu din.

18Seeye naa, miggendiyad si Hakub te amey rin wey migkahi, “Ame!”

N e migkahi si Isaak, “Seini e red. Hentew kaa, Tatu?” <sup>19</sup> Migtabak si Hakub, “Si Isaw a, ka panganey ne anak nu. Natuman kud ka insuhu nu keddi. Na Ame, enew kad wey keen kad e kayi te mahintalunan ne ngalap eyew egpanalanginan ad nikeykew.” <sup>20</sup> Piru mig-inse si Isaak, “Mania te mahaan ke re nekeutel, Tatu?”

N e migtabak si Hakub, “Imbulihan a te Magbebaye ne Manama nu.”

21Ne migkahiyan ni Isaak si Hakub, “Hendini ka eyew egpakkasam-sam a keykew, eyew egkanengnengan ku ke si Isaw ke naa iya.” <sup>22</sup> Sikan naa ka migdani-rani e si Hakub diye te amey rin wey insamsam e sikandin te amey rin te migkahi, “Iling te laheng ni Hakub ka laheng nu, piru ka belad nu, iling te belad ni Isaw.” <sup>23</sup> Ware neileyi ni Isaak si Hakub su bulbulen ka belad din iling te belad ni Isaw. Ne egpanalanginan din e perem si Hakub <sup>24</sup> piru mig-inse pad man-e sikandin, “Si Isaw ka iya?”

**N** e migtabak si Hakub, “Uya, **w** ey egpeiluk-iluk sikandan keykew.”

25Ne migkahi si Isaak, “Sendari ad e te ngalap ne inggilutu nu. Ke egkakeen kud e sika, egpanalanginan kud sikeykew.” Ne insendad e seeye ni Hakub wey insendaran din pad man-e te binu, ne migkeen e sikandin wey mig-inum. <sup>26</sup> Nataman, migkahi si Isaak, “Hendini ka, Tatu, wey hareki a.” <sup>27</sup> <sup>105</sup> Sikan naa ka migdani-rani si Hakub ne miggarek ki Isaak. Te nakaarek e si Isaak te ngareg te kumbale din, henduen pad ne impanalanginan din si Hakub te migkahi,

“ Ka ngareg te anak ku

**n** ekeiling te ngareg te kabbenesan

**n** e impanalanginan te Magbebaye ne Manama.

28Egbehayan ka te Manama te demmug ne egligkat diye te langit,

**w** ey egkeuyahan te pinamula ka kamet nu kayi te ampew te tane,

**w** ey egmatubung ka te keenen wey binu.

29 <sup>106</sup> Egkeyimu ne suluhuanen nu ka me nasud,

**w** ey egpamakey sikandan keykew.

**E** gpakabuut ka te karumaan nu,

**E** gdilusen seeye se egdilus keykew,

**w** ey egpanalanginan seeye se egpanalangin keykew.”

Ka pegpeyimmimenew ni Isaw te panalangin ni Isaak

30Te nekeimpus e si Isaak ka egpanalangin ki Hakub, mig-awe e si Hakub diye te amey rin. Ne neiyuhan de iya sikandin ni Isaw te migpanitingen. <sup>31</sup> Miggilutu degma sikandin te mananam ne pegkeen wey in-uyen din e seeye te amey rin. Ne migkahi sikandin, “Ame, enew kad wey keen kad e kayi te mahintalunan ne sere eyew egpanalanginan ad nikeykew.”

32Piru mig-insaan sikandin ni Isaak, “Hentew kaa?”

**M** igtabak sikandin, “Si Isaw a, ka panganey ne anak nu.”

33Te sikan de, ingkelkel amana si Isaak wey migkahi, “Hentew naa ka migsedad e keddi te neutel din ne mahintalunan? Nakabusan e re iya nikeykew ka migkeen dutu, wey napanalanginan kud sikandin. Ne kene kud seeye egkaawi.”

34Te nakarineg dutu si Isaw, migpanaman e sikandin migpan-dalawit wey migkahi, “Ame! Panalangini e red degma nikeykew!”

<sup>105</sup> + **27:27-29:** Hib 11:20.

<sup>106</sup> + **27:29:** Hin 12:3.

35Piru migtabak si Isaak, “Ka hari nu bes ka miggendini ne mig-akal keddiey. In-ahew rin e ka panalangin nu perem.”

36<sup>107</sup> Migkahi si Isaw, “Malehet iya ne egngaranan sikandin ki Hakub,<sup>108</sup> su kararuwa ad nikandin ahawi. In-ahew rin ka katenged ku isip panganey wey kuntee, in-ahew rin e man-e ka panalangin ku perem. Menua, warad nasame ne panalangin nu keddii?”

37Ne migtabak si Isaak, “Kuntee, neyimu kud sikandin ne ahalen nu wey egkeyimu ne suluhuanen din ka langun ne karumaan din. Egmatubung layun sikandin te keenen wey binu. Na, nekey bu naan de ka nasame ne iga-kabehey ku keykew, Tatu?”

38<sup>109</sup> Piru migpabulus si Isaw ka migpeyimmimenew te amey rin ka migkahi, “Warad iya panalangin nu keddii ne nasame, minsan deisek? Ame, panalangini e red degma nikeykew!” Ne migpanaman pad man-e si Isaw migpandalawit.

39<sup>110</sup> Ne intabak sikandin te amey rin,

“ Mariyu te egkeuyahan te pinamula ka egkeugpaan nu,

w ey mariyu degma seini te dem-mug

n e egligkat diye te langit.

40<sup>111</sup> Egkeuyag ka pinaahi te panganiban nu ne kampilan,

w ey egpamakey ka te hari nu.

P iru ke eg-apul ka,

e gpakaawe ka te pegmandu din.”

41Ne indumutan ni Isaw si Hakub su sikandin ka napanalanginan te amey rin. Migkahi sikandin diye te geyinawa rin, “Te kene egkaluhay, eg-patey e si Ame. Ne due, eggimatayan ku si Hakub.”

42Piru nahuhuran si Ribika meyitenged te pegleialis ni Isaw, sikan naa ka impeumew rin e si Hakub wey migkahiyan, “Eglelaisan ka te eggi-matey te kakey nu ne si Isaw eyew egkabewu ka langet din keykew.<sup>43</sup> Purisu, Tatu, tumana nu ka lalag ku. Pallahuy ka diye te maama ku ne si Laban ne diye mig-ugpe te Haran.<sup>44</sup> Diye ke pa tagtaheed ugpe te kandin taman te egkabewu e ka langet te kakey nu keykew.<sup>45</sup> Igpaangey ku re sikeykew ke egkalingawan din e ka inggimu nu kandin. Su kene ne meupiya keddii ne egpekelegse kew egkaawe kayi te keddii.”

Ka pegpeyipanew ni Isaak ki Hakub peendiye ki Laban

<sup>107</sup> + 27:36: Hin 25:29-34.

<sup>108</sup> + 27:36 Te Hibruwanen: “mig-eakal” ka maralem ne kaluwasan te lalag dan ne “Hakub.”

<sup>109</sup> + 27:38: Hib 12:17.

<sup>110</sup> + 27:39-40: Hib 11:20.

<sup>111</sup> + 27:40: Hin 36:8; 2Har 8:20.

46Ne migkahiyan ni Ribika si Isaak, “Kena ad perem egpakaantus te me Hitihanen ne in-asawa ni Isaw. Ke egpakaasawa pad man-e si Hakub te Hitihanen ne mahinged ded kayi, me-upiya pad ke egpatey ad.”

28Ne impeumew ni Isaak si Hakub wey impanalanginan din. Ne impanpanayan din sikandin te migkahi, “Kene ka asawa te malitan ne kayi ne mahinged te Kanaan.”<sup>2</sup> Hendiye ka te Padan-aram, diye te baley te apu nu ne si Bituil ne amey te iney nu. Ne diye ka mule asawa te sabeka ne anak te anggam nu ne si Laban.<sup>3</sup> Eghanalanginan ka te Manama ne Amana ne Maresen wey egbehayan ka nikandin te masalig ne anak eyew egkeyimu ka ne amey te masalig ne nasud.<sup>4</sup><sup>112</sup> Iggalin perem te Manama diye te keykew wey peendiye te me kabuhalan nu ka panalangin ne imbehey rin ki Abraham eyew sikeykew ka egpakakamuney te seini se intagtaheeran nu te eg-ugpe ne imbehey te Manama ki Abraham.”<sup>5</sup> Nataman, impeyipanew e ni Isaak si Hakub diye te Padan-aram ne migugpaan te anggam din ne si Laban ne anak ni Bituil ne matig-Aramiya. Si Laban maama ni Ribika ne iney enni Hakub wey Isaw.

Ka peg-asawe e man-e ni Isaw

6Nakarineg si Isaw ne impanalanginan ni Isaak si Hakub wey impeendiye te Padan-aram eyew diye egpaasawaa. Nakarineg degma sikandin ne impanpanayan si Hakub te pegpanalangin kandin ne kene eg-

asawa te malitan ne matig-Kanaan.

<sup>7</sup> Nanengnengan man-e ni Isaw ne migtuman si Hakub te ingkahi te amey wey iney rin kandin wey miggendiyad e te Padan-aram.<sup>8</sup> Ligkat dutu, nanengnengan e ni Isaw ne egkeepes ka amey rin te me malitan ne matig-Kanaan.<sup>9</sup> Purisu, miggendiyad e si Isaw te anggam din ne si Ismail wey migduruwey e man-e ki Mahalat. Talaari si Mahalat wey si Nibayut ne me anak ni Ismail ne anak ni Abraham.

Ka pegkataheinep ni Hakub diye te Bitil

10Ne mig-awe e si Hakub diye te Birsiba wey miggendiyad te Haran.

<sup>11</sup> Te peglineb te aldew, nekeume e sikandin diye te sabeka ne inged wey diye pad sikandin miggirehe. Migkuwa si Hakub te batu ne egulunanan din wey miggibat e su eglichereng e.<sup>12</sup><sup>113</sup> Ne nakataheinep sikandin ne due haheran ne naka-pabunsud diye te tane ne nekeuma diye te langit. Nakita rin ne due me panalihan te Manama ne migmaneyik wey migmamaneug te seeye ne haheran.<sup>13</sup><sup>114</sup> Nakita rin degma ka Magbebaye ne Manama ne migsasindeg diye te lenged din wey migkahi, “Sikeddi ka Magbebaye, ka Manama te apu nu ne si Abraham wey Manama degma te amey nu ne si Isaak. Igbehey ku keykew wey peendiye te me kabuhalan nu ka seini ne tane ne miggibatan nu.”<sup>14</sup>

<sup>115</sup> Keureme, masulug ka me kabuhalan nu ne egpekeiling te alinepung kayi te tane. Egpekeempet sikandan diye te igsile wey iglineb, wey diye te

<sup>112</sup> + 28:4: Hin 17:4-8.

<sup>113</sup> + 28:12: Huw 1:51.

<sup>114</sup> + 28:13: Hin 13:14-15.

<sup>115</sup> + 28:14: Hin 12:3; 22:18.

igkahibang wey igkakawanan ne balabahan. Pinaahi keykew wey te me kabuhalan nu, egpanalanganan ku ka langun ne nasud kayi te ampew te tane.<sup>15</sup> Tantanuri nu ne egdumaan wey egbantayan ku sikeykew minsan hendei ka egbaye. Keureme, igpalibed ku red sikeykew te seini ne tane. Kene ku sikeykew eg-engkeran taman te egkatuman e ka langun ne insaad ku keykew.”

16Ne nekeyimate e si Hakub wey nakakah, “Kayi bes ka Magbabayne Manama te seini ne inged, piru wara a mule nakanengneng.”<sup>17</sup> Naliyasan sikandin wey migkahi, “Makaliyas-liyas seini ne inged! Ugpaan bes iya seini te Manama wey gu-mawan peendiye te langit.”

18Ne migselem-selem mig-enew si Hakub wey ingkuwa rin ka batu ne in-ulunanan din wey impasasindeg din eyew egkeyimu ne eglimlimuan. In-itisan din seeye te lana te ulibu eyew egkeyimu ne matulus.<sup>19</sup> Ne migngaranan din ka seeye ne inged te Bitil,<sup>116</sup> piru Lus dengan ka ngaran dutu.<sup>20</sup> Ne migsaad si Hakub ne migkahi, “Ke egdumaan wey egbantayan a nikeykew Manama te seini ne hipanew ku, wey ke egbehayan a nikeykew te egkeenen, manggad,<sup>21</sup> wey ke meupiya ka peg-uli ku diye te baley te amey ku, eg-ileen kud sikeykew Magbebabe ne Manama ne Manama ku.<sup>22</sup> Ne seini se batu ne impasasindeg ku, iyan tuus ne kayi ka ugpaan nu. Ne igbehey ku keykew ka igkasapulu ne baad te langun ne igbehey nu keddiey.”

Ka pegginguma ni Hakub diye te baley ni Laban

29Ne migpabulus si Hakub ka miggipanew taman te nekeuma rin e diye te inged te matig-igsile.<sup>2</sup> Te diyad e sikandin, due nakita rin ne tatelu ne punduk te karniru ne migbuluku diye te lenged te belun ne egsaksakuhan te igpeinum te me ayam. Ne ka belun, intel-eban te dakel ne batu.<sup>3</sup> Due batasan dan ne emun ke egkalibulung e ka langun ne karniru, human pad egbekara te me talagtamen te karniru ka batu ne intel-eb te belun. Ke egpekeimpus e sikandan ka egpeinum te me karniru, iglibed dan ded man-e igtel-eb ka batu diye te belun.

4Mig-insaan ni Hakub ka me talagtamen, “Me suled, hendei kew ne mahinged?” Migtabak sikandan, “Matig-Haran key.”

5Mig-insaan din e man-e sikan-dan, “Nekeila kew naa te etew ne egn-garanan ki Laban ne apu ni Nahur?”

M igtabak sikandan, “Uya.”

6Mig-insaan din e man-e sikan-dan, “Menua sikandin?” Ne migtabak sikandan, “Meupiya ma. Pitew ka, sikan bes en iya ka anak din ne si Rakil ka eg-uyan te karniru te amey rin.”

7Migkahi si Hakub, “Kene pad ne eleg ne timpu ne eglibulungen ka me karniru su maaldew pad, meupiya pad ke egpeinumen niyud kuntee wey egpepanabtaben pad man-e.”

<sup>116</sup>+ 28:19 Te Hibruwanen: “baley te Manama” ka kaluwasan te lalag ne “Bitil.”

8Piru migtabak sikandan, “Kene ney pad egpeinumen ka me karniru ke kene pad egkalibulung langun. Ke egkalibulung e langun, henduen pad ne egbekaren ney ka batu ne intel-eb te belun eyew egpeinumen ka me karniru.”

9Te sasangan pad ne egpalalahay sikandan, nekeume e si Rakil ka mig-uyan te me karniru te ameyrin, su sikandin ma ka talagtameng te karniru. <sup>10</sup> Te pegkakita ni Hakub te atebey rin ne si Rakil ne anak te anggam din ne si Laban, wey te me karniru rin, miggendiyad sikandin te belun wey imbekad din e ka batu ne intel-eb dutu wey impeinum din e ka me karniru te anggam din. <sup>11</sup> Nataman, miggarekan din si Rakil wey nakasinehew sikandin ka neyinghingesa. <sup>12</sup> Ne migkahiyan din si Rakil, “Maama a nikeykew su anak a ni Ribika ne atebey te ameynu.”

**S**ikan naa ka mig-uli e si Rakil ne migpallahuy wey migpangguhuran din e ka amey rin. <sup>13</sup> Te pegkarineg ni Laban meytenged te peglepew ni Hakub, migpallahuy e degma sikandin ka egsinug-ung te anaken din. Migkepkepan din si Hakub wey miggarekan, wey induma rin e diye te baley. Te nekeuma ran e diye, migpanugtulan e ni Hakub si Laban te langun ne neula-ula rin. <sup>14</sup> Nataman, migkahi si Laban, “Ew, amana ki bes pad iya!”

Ka peg-asawa ni Hakub engki Liya wey ki Rakil

T e senge-bulan e si Hakub ka migugpe diye, <sup>15</sup> migkahiyan sikandin ni Laban, “Minsan anaken ku sikeykew,

kene egkaayun ne ware igbayad ku te peggimu nu kayi. Na, kahii a ke nekey ka igkeupii nu ne igbayad ku keykew?”

16Ne due daruwa ne anak ni La-  
ban ne mengebay; si Liya ka kakey  
wey si Rakil ka hari. <sup>17</sup> Mateles  
ka mata ni Liya, piru si Rakil, pang-  
gawakan wey subla pad ne mateles.

18Tenged te due geyinawa ni Hakub ki Rakil, migtabak sikandin,  
“Eggimu a kayi te keykew seled te pitu  
ne leg-un ke igpaasawa nu keddi si  
Rakil.”

19Ne mig-uyun si Laban ka  
migkahi, “Meupiya pad ke sikeykew  
ka igpaasawa ku kandin du te duma  
ne lukes. Purisu, uugpe kad iya kayi  
te keddiey.” <sup>20</sup> Sikan naa ka migpan-  
ganuhang e si Hakub seled te pitu ne  
leg-un eyew egyasawa rin si Rakil.  
Piru tenged te dakel ka geyinawa rin  
ki Rakil, iling te pila re ne aldew ka  
kaluhayan diye te isip ni Hakub.

21Nataman, migkahiyan ni Hakub si Laban, “Ibehey nud keddi  
ka anak nu eyew egpekeg-asawa key  
e, su natuman e ka pitu ne leg-un.”  
<sup>22</sup> Sikan naa ka migsahakeen si Laban  
wey inggingat din ka langun ne mig-  
ugpe te seeye ne inged. <sup>23</sup> Piru te  
seeye ne marusilem, si Liya ka in-uyan  
ni Laban eyew egpewuliran ki Hakub,  
wey kene ne si Rakil. <sup>24</sup> (Ne imbe-  
hayan ni Laban si Liya te uripen din  
ne malitan ne si Silpa ne igpeuripen  
kandin.) <sup>25</sup> Te pegkamaselem e, iyan  
igkateu-teu ni Hakub te si Liya bes ka  
newuliran din. Ne migkahiyan din si  
Laban, “Mania te neyimu nu seini ked-  
diey? Si Rakil ka impanganuhangan

ku keykew. Mania te inlimbungan a nikeykew?”

26Ne migtabak si Laban, “Ware batasan ney kayi ne eggun-aan egpaasawei ka hari du te kakey.<sup>27</sup> Tahad ke pa ne egkeimpusan ka senge-simana ne sahakeen te seini ne kasal su igpaasawa ku red iya keykew si Rakil. Piru wey re ke eg-uyun ka ne egpanganuhang ke pad man-e seled te pitu red ne leg-un.”

28Ne mig-uyun si Hakub ne eg-panganuhang pad man-e seled te pitu ne leg-un. Te neimpusan e ka senge-simana ne pegasahakeen te kasal ran ki Liya, impaasawe e man-e ni Laban ki Hakub si Rakil.<sup>29</sup> (Imbehayan ni La-ban si Rakil te malitan ne uripen din ne si Bilha eyew igpeuripen kandin.)

30Sikan naa ka migpewulirey e degma si Hakub ki Rakil, wey subla pad ka geyinawa rin ki Rakil du te geyinawa rin ki Liya. Migpabulus sikandin ka migpanganuhang ki Laban seled te pitu pad man-e ne leg-un.

Ka me anak ni Hakub

31Nakita te Magbebeye ne Manama ne ware geyinawei ni Hakub si Liya, sikan naa ka impaanak din si Liya. Piru ware din paanaka si Rakil.<sup>32</sup> Ne naber es si Liya wey nakaanak te lukes. Migngaranan din ka bate ki Rubin<sup>117</sup> su migkahi sikandin, “Nakakita ka Magbebeye ne Manama

te keyirapan ku, wey kuntee, eggeyi-nawaan ad te asawa ku.”<sup>33</sup> Nataman, naber es e man-e si Liya wey nakaanak ded man-e te lukes. Migngaranan din ka bate ki Simyun<sup>118</sup> su migkahi sikandin, “Tenged su narineg te Magbebeye ne Manama ne ware e pad geyinawei te asawa ku, imbe-hayan e red nikandin te igkarangeb ne anak ne lukes.”<sup>34</sup> Nataman, naber es e man-e si Liya wey lukes ded man-e ka anak din. Migngaranan din ka bate ki Libi<sup>119</sup> su migkahi sikandin, “Kuntee, egkasabeka key e ka alunggun, su nakaanak key e te tatelu ne lukes.”<sup>35</sup> Nataman, naber es e man-e si Liya wey lukes ded man-e ka anak din. Migngaranan din ka bate ki Huda<sup>120</sup> su migkahi sikandin, “Kuntee, egsay-een ku ka Magbebeye ne Manama.” Nataman, ware pad man-e mig-anak sikandin.

30Te nanengnengan ni Rakil ne kene iya sikandin eg-anak, neimme e sikandin te kakey rin. Ne migkahiyan din si Hakub, “Paanaka a nikeykew. Ke kene, egpatey a iya.”

2Nabelu si Hakub ki Rakil wey migkahi, “Manama a? Sikandin ka ware migpaanak keykew!”

3Ne migkahi si Rakil, “Seini red ka uripen ku ne si Bilha. Huliri nu sikandin eyew ligkat kandin duen ded anak ku.”<sup>4</sup> Sikan naa ka impaasawe e ni Rakil si Bilha ki Hakub wey ing-guliran din e si Bilha.<sup>5</sup> Ne naber es si

<sup>117+</sup> <sup>29:32</sup> Te Hibruwanen: “nakakita sikandin te keyirapan ku” ka kaluwasan te lalag ne “Rubin.”

<sup>118+</sup> <sup>29:33</sup> Te Hibruwanen: “ka egpakarineg” ka kaluwasan te lalag ne “Simyun.”

<sup>119+</sup> <sup>29:34</sup> Te Hibruwanen: “egkasabeka sikandan” ka kaluwasan te lalag ne “Libi.”

<sup>120+</sup> <sup>29:35</sup> Te Hibruwanen: “pegsaye” ka kaluwasan te lalag ne “Huda.”

<sup>121+</sup> <sup>30:6</sup> Te Hibruwanen: “eggukum” ka kaluwasan te lalag ne “Dan.”

Bilha wey nakaanak sikandin te lukes ne anak dan ki Hakub.<sup>6</sup> Ne migngaranan ni Rakil ka bate ki Dan<sup>121</sup> su migkahi sikandin, “Neyid-u red ka Manama keddiey! Narineg din ka peg-ampu ku su imbehayan a nikandin te lukes ne anak.”<sup>7</sup> Nataman, naberes e man-e si Bilha wey nakaanak ded man-e te igkarangeb ne lukes ne anak dan ki Hakub.<sup>8</sup> Ne migngaranan ni Rakil ka bate ki Naptali<sup>122</sup> su migkahi sikandin, “Nekeg-ehet key amana te kakey ku piru migpanalu a.”

9Te nanengnengan ni Liya ne kene pad man-e sikandin eg-anak, im-paasawa rin e degma ka uripen din ne si Silpa ki Hakub.<sup>10</sup> Nataman, nakaanak si Silpa te lukes ne anak dan ki Hakub.<sup>11</sup> Ne migngaranan ni Liya ka bate ki Gad<sup>123</sup> su migkahi sikandin, “Meupiya se kulis ku.”<sup>12</sup> Nataman, nakaanak e man-e si Silpa te igkarangeb ne lukes ne anak dan ki Hakub.<sup>13</sup> Ne migngaranan ni Liya ka bate ki Asir<sup>124</sup> su migkahi sikandin, “Subla a ne nahale! Kuntee, egngengaranan a te me malitan te mahalew.”

14Te tinggaani e te trigu, miggendiye si Rubin te kamet wey nakakita rin te palisel ne hilamunen ne egngaranan te “mandragura”, wey in-uyan din e seini diye te iney rin ne si Liya. Te pegkakita dutu ni Rakil migkahiyan din e si Liya, “Egbuyu a te mandragura te anak nu.”

15Piru migtabak si Liya, “Kene bes pad ne eleg ka peg-ahew nu te

asawa ku? Kuntee egkuuen nud e man-e ka mandragura te anak ku?”

N e migkahi si Rakil, “Ke egbe-hayan a nikeykew te mandragura, egkaayun ne egpekewulid ka ki Hakub kangkuwa ne karusileman.”<sup>16</sup>

Te maapun e, insinug-ung de ni Liya si Hakub te peg-uli din puun te kamet. Ne migkahiyan ni Liya si Hakub, “Keilangan ne diye ka eg-girehe te keddi te seini ne karusileman su migbayaran kud e sikeykew te mandragura ne nakita te anak ku.” Purisu, si Liya ka migguliran ni Hakub te se-eye ne karusileman.

17Ne intabak te Manama ka peg-ampu ni Liya wey naberes e man-e sikandin wey nakaanak e te igkalimma ne lukes ne anak dan ki Hakub.<sup>18</sup> Ne migngaranan ni Liya ka bate ki Isakar<sup>125</sup> su migkahi sikandin, “In-unahan a te Manama su imbehey ku ma ka uripen ku diye te asawa ku.”<sup>19</sup> Nataman, naberes e man-e si Liya wey miglesutan e te igkeen-em ne lukes ne anak dan ki Hakub.<sup>20</sup> Ne migngaranan ni Liya ka bate ki Sabulun<sup>126</sup> su migkahi sikandin, “Im-behayen a te Manama te meupiya ne dasag. Kuntee eggeyinawaan ad e te asawa ku su hen-em man e ka anak ney ne neelin ne me lukes.”<sup>21</sup> Nataman, nakaanak e si Liya te malitan ne migngaranan din ki Dina.

22Ne ware nalingawi te Manama si Rakil. Purisu, intabak din ka peg-ampu ni Rakil wey nakaanak

<sup>122</sup> + 30:8 Te Hibruwanen: “samuk ku” ka kaluwasan te lalag ne “Naptali.”

<sup>123</sup> + 30:11 Te Hibruwanen: “meupiya se kulis” ka kaluwasan te lalag ne “Gad.”

<sup>124</sup> + 30:13 Te Hibruwanen: “egkahale” ka kaluwasan te lalag ne “Asir.”

<sup>125</sup> + 30:18 Te Hibruwanen: “unag” ka kaluwasan te lalag ne “Isakar.”

<sup>126</sup> + 30:20 Te Hibruwanen: “dasag” ka kaluwasan te lalag ne “Sabulun.”

e sikandin. <sup>23</sup> Nataman, naber esikandin wey nakaanak sikandin te lukes wey migkahi, “In-awe e te Manama ka pegkeyilew ku.” <sup>24</sup> Ne mignaranan din ka bate ki Husi <sup>127</sup> su migkahi sikandin, “Egbehayan e pad perem te Magbebabe ne Manama te duma ne anak ne lukes.”

Ka pegpasabutey ni Hakub ni Laban

25Te ware pad naluhey si Rakil ka miglesutan ki Husi, migkahiyan e ni Hakub si Laban, “Peulia ad nikeykew diye te inged ku. <sup>26</sup> Ibehey nud keddi ka me asawa ku wey me anak ku ne nabayaran kud te pegpanuhang ku keykew su eg-uli ad e. Su nakanengneng ka ke immenu ku te egtrabahu kayi te keykew.”

27Piru migtabak si Laban, “Ke egkaayun ne kene ke pa ubag awe kayi te keddi, su natahaan ku te pegpanagne ku ne impanalanginan a te Magbebabe ne Manama tenged keykew. <sup>28</sup> Na, buyu ke re te igkeupii nu ne bayad su igbehey ku keykew.”

29Ne migtabak si Hakub, “Nakanengneng ka ke immenu ku te peggimu kayi te keykew wey nabuhal ka me ayam nu tenged te pegtanggu ku. <sup>30</sup> Su dengan, te ware e pad miggendeni, deisek de ka karatuan nu, ne kuntee, migdakel e ne subla. Su impanalanginan ka te Manama pinaahi te langun ne neyimu ku. Piru kuntee, keilangan ne iyan kud egtangguwen ka me asawa ku wey ka me anak ney.”

31Ne mig-inse man-e si Laban, “Nekey ka ighbayad ku keykew?”

N e migtabak si Hakub, “Kene ne seleppi. Wey e re egpabulus egtanggu te ayam nu ke egkabennalan ka te igkahi ku keykew. <sup>32</sup> Ipeendiya a nikeykew te me ayam nu kuntee eyew igsuwey kud ka langun ne kambing ne balangbangan wey ka langun ne karniru ne meitem. Sikan e ibayad nu keddi. <sup>33</sup> Te mewuri ne me aldew, egkanengnengan nu ke egkasalihan e naa wey se kene. Ke due egkiteen nu diye te me kambing ku ne kene ne balangbangan, wey ke due karniru ne kene ne meitem, egpakakah ke naa te intakew ku sika diye te keykew.”

34Ne migtabak si Laban, “Uya. Eg-uyun a te ingkahi nu.” <sup>35</sup> Piru te seeye ded ne aldew, insuwey ni Laban ka tagse kambing ne balangbangan ne lukes wey beyan, lagkes ka me karniru ne meitem. Ne impatamenan din e seeye te me anak din ne lukes. <sup>36</sup> Impanguyan dan seeye te kariyuan ne tatelu ne aldew ka peggiapanew ligkat ki Hakub. Ne si Hakub ka migtanggu te duma ne me ayam ni Laban ne nasame.

37Ne migkuwa si Hakub te meyilew ne me sugpang te alamu, almindras, wey platanu, wey impanluwitan din ka kakiliran te me sugpang eyew due egpekeepus ne me maangkag diye te me sugpang. <sup>38</sup> Ne diye din itahu ka me sugpang ne inluwitan din te lenged te me tahuunan te igpeinum te me ayam eyew egkiteen te me ayam ni Laban. Su egpaaharey ma sikandan ke eg-inum. <sup>39</sup> Sikan naa, ka me ayam ne naaharan diye te lenged te me sugpang ne due nekeepus ne maangkag, nakaanak sikandan te me balangbangan.

<sup>127</sup> + <sup>30:24</sup> Te Hibruwanen: “egtimul pad perem sikandin” ka kaluwasan te lalag ne “Husi.”

40Te pegpaaharey te me karniru, insuwey ni Hakub ka me maangkag wey diye din ipatangke te me balangbangan wey me meitem ne ayam ni Laban. Sikan naa ka migmasalig ka ayam ni Hakub wey insuwey rin diye te me ayam ni Laban.

41Ne emun ke egmaaharey e ka me manekal-nekal ne me ayam, egkuen ni Hakub ka me sugpang wey diye igtahu te tangkaan dan eyew egkiteen dan. <sup>42</sup> Piru ware din tahui te me sugpang ka tangkaan te mahuye-guye ne me ayam. Te ware naluhay, neelin e ne mahuye-guye ka me ayam ni Laban, piru neelin ne manekal-nekal ka me ayam ni Hakub. <sup>43</sup> Purisu, naratu e ne subla si Hakub. Migmasalig amana ka me uripen din, me karniru, me kambing, me kamil, wey me asnu.

Ka peggallahuy enni Hakub puun ki Laban

31Ne due narineg ni Hakub ne lalag te me lukes ne anak ni Laban ne migkahi, “Impanakawan ni Hakub ka amey ta wey naratu sikandin ligkat te impanakew rin diye te amey ta.” <sup>2</sup> Ne nakita degma ni Hakub ne kenad ne meupiya ka pegasahipe ni Laban kandin iling te dengan. <sup>3</sup> Ne migkahiyan sikandin te Magbebaye ne Manama, “Uli kad diye te inged te amey nu, te apu nu wey karumaan nu, wey egdumaan ku sikeykew.”

4Sikan naa ka impeumew ni Hakub si Rakil wey si Liya ne eg-peeendiyeen te kandin diye te egpanapanabtaban te me ayam din. <sup>5</sup>

Migkahiyan din sikandan, “Nakita ku ne kenad ne meupiya ka pegasahipe te amey niyu keddi iling te dengan. Piru indumaan a te Manama te amey ku. <sup>6</sup> Nakanengneng kew te migpakannekal a ka miggimu diye te amey niyu. <sup>7</sup> Piru in-akalan a nikandin su kasapulu din balbalawi ka bayad ku. Piru wara a balahara te Manama ne egde-deehen e re te amey niyu. <sup>8</sup> Te pegkahi rin ne ka balangbangan ka igbayad din keddi, mig-anak degma ka langun ne kambing te balangbangan. <sup>9</sup> Sikan naa ka in-angete Manama ka ayam te amey niyu wey imbehey rin e keddi.

10“Te timpu ne migpallebag ka me beyan, nakataheinep a te due me balangbangan wey buling ne me kambing ne mig-ahad te me beyan ne kambing. <sup>11</sup> Ne migkahiyan a te panalihan te Manama diye te taheinep ku, ‘Hakub!’ Ne migtabak a, ‘Seini e red!’ <sup>12</sup> Ne migkahi sikandin, ‘Pitawa nu, me balangbangan wey buling ne me kambing ka mig-ahad te me beyan. Inggimu ku sika su nakita ku ka langun ne inggimu ni Laban keykew. <sup>13</sup> <sup>128</sup> Sikeddi ka Manama ne migpakita keykew diye te Bitil, ka inged ne in-itisan nu te lana te ulibu ka batu ne impasasindeg nu wey migsesaad ka degma keddi diye. Na, awe kad kayi wey uli kad diye te inged ne migligkatan nu.’ ”

14Ne migtabak ensi Rakil wey si Liya, “Uya, su warad egkakuwa ney diye te amey ney ke egpatey sikandin. <sup>15</sup> Kuntee, lapu key naan de diye te isip din. Su impabayaran key e nikandin wey naamin din e ka imbayad kanami. <sup>16</sup> Kante e wey peendiye te me anak ta ka langun ne

<sup>128</sup> + 31:13: Hin 28:18-22.

karatuan ne ingkuwa te Manama diye te amey ney. Purisu, himuwa nu ka innangen te Manama keykew.”

17Nataman, impeuntud e ni Hakub te me kamil rin ka me asawa rin wey me anak din. <sup>18</sup> Impewun-a rin ipaalew ka me ayam din ne nakuwa rin diye te Padan-aram. Miglikat e sikandin ka eg-uli diye te inged te Kanaan ne mig-ugpaan te amey rin ne si Isaak. <sup>19</sup> Te seeye ne timpu, intakew ni Rakil ka me diyus-diyus ne egsimbeen te amey rin te iyug din te migpanabulug te me karniru rin. <sup>20</sup> Naakalan ni Hakub si Laban ne matig-Aramiya su ware din kahii ne eg-awe e sikandan. <sup>21</sup> Migpallahuy e ensi Hakub ne migpanguyan te langun ne karatuan din. Miglapas sikandan te Weyig ne Iyupratis ne miggendiyad te inged te Gilyad.

Ka peglupug ni Laban ki Hakub

22Te tatelu e ne aldew ka miglihad, nahuhuran e si Laban te migpallahuy ensi Hakub. <sup>23</sup> Te sikan de, impanlibulung din e ka me suled din wey inlupug dan e ensi Hakub. Napituwan sikandan ne aldew human dan neu-maan ensi Hakub diye te bubungan te Gilyad. <sup>24</sup> Piru te seeye ne karusileman, migpakita ka Manama ki Laban diye te taheinep wey migkahi, “Ayad-ayad ka te iglalag nu ki Hakub.” <sup>25</sup> Ne neumaan enni Laban ensi Hakub ka egpasasindeg te balungbalung dan diye te bubungan te Gilyad, wey diyad iya degma sikandan migpasasindeg te balungbalung dan.

26Ne migkahiyan ni Laban si Hakub, “Mania te mig-akalan a nikeykew? Mania te in-ahew nu ka me anak ku iling te egkarakep te gira

wey eg-uripenen e? <sup>27</sup> Mania te mig-akalan a nikaniyu wey miglunus kew migpallahuy? Ke migpataha kew pa, meupiya perem ka pegpaligkat ku kaniyu wey due perem peg-ulahing ne egkabales te tehunggu wey salurey. <sup>28</sup> Mania te wara a nikeykew pahareka te me anak ku wey te me apu ku? Keungelan seini se inggimu nu! <sup>29</sup> Egkaayun ne egdereetan ku sikeykew kuntee, piru gabii te marusilem, migpakita keddi ka Manama te amey nu wey migkahiyen a nikandin, ‘Ayad-ayad ka te iglalag nu ki Hakub.’ <sup>30</sup> Nakanengneng a te mig-awe ka su naalimengawan kad amana diye te kaniyu, piru mania te impanakew nu ka me diyus-diyus ne egsimbeen ku?”

31Migtabak si Hakub, “Iyan ku impallahuy su naaldek a ne kema ke egpehesen nu te eggawi ka me anak nu. <sup>32</sup> Piru meyitenged te nalaag ne me diyus-diyus nu, ka minsan hentew kayi te kanami ne egkitaan nu dutu, egkaayun ne eggimatayan sikandin. Kayi te tangkaan te me suled ta, tinurua nu ka minsan nekey ne keykew wey hawia nu.” Piru ware nakanengneng si Hakub ne si Rakil bes ka migtakew te diyus-diyus te amey rin.

33Ne migseled si Laban ka eg-pamitew te me diyus-diyus din diye te balungbalung ni Hakub, balungbalung ni Liya, wey diye te balungbalung te daruwa ne uripen ne duwey ni Hakub, piru ware din nakita ka me diyus-diyus din. Nataman, migseled e man-e sikandin diye te balungbalung ni Rakil. <sup>34</sup> Ne inggeles bes ni Rakil ka me diyus-diyus diye te sakang te kamil rin, wey migpinnuuwan din seini. Purisu, ware nakita ni La-